

بسم الله الرحمن الرحيم

الحمد لله

والصلاة

والسلام على

سيدنا محمد وآله

والصلاة والسلام على

سيدنا محمد وآله

والصلاة والسلام على

سيدنا محمد

والصلاة

والسلام

على سيدنا محمد وآله

بسم الله الرحمن الرحيم

شريف حمدي

بس خلاص / ساخر

شرين حمدي

الطبعة الأولى ، ٢٠١١



دار اكتب للنشر والتوزيع

١٠ شارع عبد الهادي الطحان، المرج الغربية

موبايل : ٠١١٠٦٢٢١٠٣

E – mail : dar_oktob@gawab.com

المدير العام :

يحيى هاشم

إسلام جاويش

هشام مرعي

رقم الإيداع : ٢٠١١/٢٢٢٥

I.S.B.N: ٩٧٨-٩٧٧-٤٨٨-١٢٤-٦

جميع الحقوق محفوظة ©

بس خلاص

ساخر

شرین حمدي

الطبعة الأولى

٢٠١١



دار اكتب للنشر والتوزيع

حياتي كابوس حقيقي فأنا أعيش في بيت العيلة
لا.. لا .. ليس هذا وقت الأحلام الوردية عن الحميمة، الترابط
والدفء العائلي ..

هذا وقت الكلام عن الخصوصية المعدومة ... الشجار
والأصوات العالية الذي جعلت الهدوء في منزلنا ينتحر
بيت العيلة ... كيف فكر جدي بهذا الأسلوب؟! ... لأنه ولد
وحيدا قرر أن ينجب كثير ورزقه الله بخمس أولاد وبنيتين
لذا قرر أن يبني هذا المنزل الكبير أقصد العمارة ليعطي كل ولد
وكل بنت شقة ليتزوج ولا تتشتت العيلة قط....

كل ولد تزوج أنجب وكل بنت تزوجت أنجبت ...
أصبحت أعيش مع جيش.

ويا سلام كيف يكون الحال إذا أعلنت جدتي الحرب علي
الكنائين بمساعدة البنات طبعاً يا الله كم تصبح حياتنا جميلة ...
بيت العيلة الكنة طوال فترة الخطوبة تسأل رأي الحما و الحما
لا تريد أن تتدخل.

- أصل دي حياتكم وأنا مالي المهم تكونوا مبسوطين

- الكنة : أنت الخير والبركة وكلامك علي راسنا.

طيب بعد الزواج؟ الكنة تعلن الاستقلال التام أو الموت
الزؤام.....

الحما - دا ابني.. وللا علي رأي المثل ربي يا خاية للغاية!؟
الحروب لا تتوقف والمعارك مستمرة
الأزواج في حالة من الطناش! من مجنون يدخل نفسه في تلك
الحرب الهوجاء!
الأحفاد في مارثون من الأشطر ومن الأروش
وأخيرا الجد المسكين يضرب كف علي كف ويتحسر علي
الحلم الذي ضاع.

الحرب العالمية الأولى

كل فترة - ليست محددة - تشن جدي حروب علي الكناين.
ولأن كل الأطراف قوى عظمي، لذلك فهي تصبح حروب
عالمية ، حتي أنني أصبحت أدون تلك الحروب _ فراغ_

هل تعرفون ماذا اكتشفت؟ .. أن هناك ما لا يقل عن
ثلاث حروب كل شهر مع اختلاف الحجم والمدة قبل إعلان
الهدنة!!..

الحرب العالمية الأولى لهذا الشهر كانت بسبب الجميري ..
نعم الجميري هذا المخلوق البحري الوضع الذي تسبب في
الكثير من تبادل القذائف البرية والجوية علي حصن الكنة العدو

لقد طلبت جدي من الكنة الكيري "طنط ناهد" أن تبث
لها ٢ كيلو جميري لعمل كيبية وكفتة لكن الكنة اللثيمة
أحضرت كيلو ونصف فقط من الجميري صغير الحجم

اشتعلت جدي غيظا لماذا لم تأت لها الكنة بما طلبت ...
ألقت جدي كيس الجميري أرضا

-إيه دا؟ دا جميري دا ولا دود؟ وبعدين ماله قليل كدا؟

-معلش ياماما أصل الفلوس ماكفتش إلا كيلو ونص بس

- ما كفتش ... كنتي كملي من معاكي وبعدين هحاسبك
ولا فكراني هكلهم عليكي؟

- العفو يا ماما إزاي بس

- وبعدين ماله صغير كدا

- أصل الكبير اللي حضرتك طلبتيه كان غالي حبتين ومش
طازه وكمان مش بلدي مزارع لكن دا طازه وبلدي بصي كدا
وبعدين ماهواش صغير للدرجة دي

- آه يعني أنا بفتری عليكي

وبعد نصف ساعة من القذف البري علي حصن الكنة
جاءت المساعدات .. ماذا؟ لا ليس للكنة! .. بل للجهة
العظمي - إفتراء-

جاءت والدتي

- فيه إيه يا ماما؟ ... صوتكو غالي ليه بس

لهت جدتي وأمسكت صدرها ثم ضيقت مقلتيها قليلا

- تعالي شوفي مرات أخوكي .. فكراني حرامية

- دهشت الكنة لتلك الضربة المفاجئة التي أطاحت بالجناح
الأيمن وأسرعت بالنفي

-أبدا يا أبلة ... كل اللي حصل أن ماما طلبت مني جميري
ورحت جيته بس الف.....

-أنتي كمان بتكدييني؟ (جدتي مقاطعة)

تدخلت أمي :

-أبله! ... أبله مين يا حبيبي؟ قال أبله قال.. ماكانوش
خمس سنين عمي

وبعدين يا ماما ... كملي يا حبيبي

ضعف صوت جدتي في محاولة بائسة ومكشوفة جدا لتبدو
ضعيفة ، مغلوقة علي أمرها

-كل دا عشان كان نفسي في شوية كبية وكفتة ... أقوم
أتبهدل كدا علي آخر الزمن

علا صوتها فجأة

-لكن أنا مش هسكت (أشارت للكنة بإصبعها) أنت
فاهمة؟ مش هسكت علي كدا أبدا

-لا عاش ولا كان اللي يبهلك يا ماما ... أنا ليا كلام مع
البية جوزها لما يرجع .. هي حصلت تبهلك كمان

بعد كل هذا القذف الجوي والبري لم تتمالك الكنة نفسها
أكثر وبدأت بقذف الهاون علي جدي ووالدي
وليه تستني لما يرجع تحي أطلبهولك لو موبيلك مش
معاكي أو حتي توفرني تمن المكالمه عادي يعني في بيتها
تملكت أمي الدهشة فالقذف كان مفاجيء وفي ذهول
أجابت

-يعني مش همك ...

وكأنها تكلم نفسها قالت

-أوفر تمن المكالمه ... هي القوالب نامت والانصااص قامت
ولا أيه

قاطعتها الكنة

-يقولك أيه يا أبله كفاية غلط لحد كدا وكلامك بعد
كدا مع جوزي

انصرفت الكنة بعد أن حطمت كل حصون العدو في شنة
مفاجئة علي الأسطول الجوي ثم صفقت الباب بشدة خلفها
وكانت تلك القشة التي قسمت ظهر البعير
-شفني إزاي بترزع الباب في وشنا

-معلش ماهو العيب مش عليها العيب علي
ال..... فين التليفون أنا هكلمه ولما أشوف هيعمل
ايه سبع الرجال دا؟

لم تفلح محاولات خالي البائسة للصلح بين الطرفين. كل
طرف متمسك بموقفه حتى أنه أصبح لكل طرف أنصار
وتقسمت العيلة لثلاث أحزاب..

الحزب الأول هو حزب جدتي والذي يضم والدتي وخالتي
رغم كونه من ثلاث أفراد فقط لكن لا يستهان به..

الحزب الثاني هو حزب الكناين لقد انضمت الكناين الأربعة
لمنصرة الكنة الكبرى ناهد ولا تصدقوا المثل الذي يقول أن
مركب السلايف غارت،

لا وألف لا ، في وقت الشدة يتكاتفن لتصنعن درع وحصن
بشري يغلب خط بارليف " رحمه الله "

أما الحزب الثالث فهو الحزب المحايد وأقصد بالمحايد السليبي
الذي يشاهد في صمت دون تدخل مهما حدث وهذا الحزب
يضم جدتي ، أخوالي ، أبي و زوج خالتي... (كل الرجال يعني)
تتساءلون طبعاً عن وضعي أنا وباقي الأحفاد..

لكل حرب ضحايا، هؤلاء هم نحن.. الضحايا!

منا من أصبح مراسل حرب - كلنا نعلم جيدا أن مراسل الحرب من أول ضحايا الحرب دائما " اقطعوا رأس الرسول " - في وضعنا هذا يقطع عنه مورده المالي كنوع من العقاب لانضمامه للحزبين الأولين ... ذلك لا يحدث أبدا ولكن كل حزب اعتبرنا تبعا للحزب الآخر " إفترء "

ومنا من اختار أن يكون عميل وجاسوس مزدوج، وذلك ليضمن سلامة موارده المالية من المصادرة والحجر عليها، ويضمن حسن معاملة الأسري فمعاهدة جنيف ليس لها مكان في منزلنا.

بعد بعض المناوشات الخفيفة بين الحزبين الأولين استطاعت جدتي كسب الحرب وفرض مطالبها.. فالحرب خدعة !

علمت جدتي من إحدي الجواسيس أن الكناين قد زودوا أنفسهم بأسلحة فتاكة ستطيع بجهتها الداخلية تماما من أول قذفة. لذلك كان عليها زيادة الجيش الخاص بها.. فلا بد من تجنيد أفراد الحزب المحايد لحزبها.

جمعت العائلة كلها لمشاهدة المواجهة بينها وبين الكناين في عرض حصري. وما أن أنزلت الكناين فرقة المشاة، حتي سقطت جدتي مغشي عليها!! وبذلك الحركة المكشوفة جدا -

للكنائين - ألفت جدتي عليهن قبيلة تشبه قبيلة هيروشيما
وناجازاكي، واستطاعت ضم الحزب الثالث بكامله
لها. وبالطبع، فلم يكن أمام الكنائين سوي رفع الراية البيضاء،
وإعلان الهزيمة في انتظار مطالب جدتي.

مطالب جدتي:

الأول: الاعتراف الرسمي بأنها علي حق وهم مخطئون

الثاني: الاعتذار الرسمي

أما الثالث الانتقامي: فقيام الكنائين بشراء كمية كبيرة من
الجميري (الدود) وتقشيره لأنه (بلدي وطازة.. مش زي
الكبير) !

الشراب دا كحلي ولا أسود

جدي ذو شخصية سيادية، رغم رومانسيته التي تحدثنا عنها مسبقا.. له هبة، صوته رنان، مخارج كلماته واضحة.. ويعرف دائما ما يريد.

سيءٌ حظه من يطلب جدي منه طلب.. ولندرة حدوث هذا، فمن المتوقع أن يتم تنفيذ طلبات جدي حسب معايير محددة جدا!

أيقظتني أختي اليوم باكرا.

- كرم.. قوم جدو عايزك.

ولأن أختي حفيذة بارة جدا بجدها، فهي تخشي إغضابه دائما. وأي طلب صغير يتحول داخلها لأمر واجب النفاذ في الحال.

تململت في نومي طالبا منها منحي نصف ساعة أخرى أنامها. لكن أختي كانت - كعادتها - ملحة جدا.

- أمري لله ... أدبني قمت ارتحتي ... روعي بقي اعمليلي شاي

- شاي إيه ياعم دا بيقول عايزك حالا

ابتسمت في خبث

- قال حالا وللا أنتي خمنتي؟

زفرت في حنق..

- أنا مالي .. منك له. بس ماترجعش تقول يا ريت.

استسلمت، وقمت من سريري الدافئ المريح فاغتسلت
متعجلا، وذهبت إلى جدي.

- كرم عايزك تشتريلي ٣ شرابات أسود و كحلي وبني من
ماركة (-----) هتلاقيهم في محل -----

بعد نصف ساعة من الوصف التفصيلي لمكان المحل
والشرابات داخل المحل استطعت أخيرا الكلام

- حاضر يا جدي مسافة السكة سلامه عليكم

- كرم الألوان تبقي واضحة بس غامقة يعني ماتجيش
الشراب لبني وللا زهري وتقولي دا كحلي كحلي يعني
كحلي

نصف ساعة أخرى.. وعدت لجدي بالشرابات. دخلت
عليه دخول المنتصر فلقد أتيت بالمطلوب دون عناء ... في زهو

أعطيته ما أتيت به.. تصلب وجهه قليلا وهو يقلب فيها، ثم
سألني بهدوء قاتل

- إيه دا؟

بدأ زهوي يضعف وحلقي يحف

- الشرابات!

أزاح نظارته قليلا، ورفع عينه ليلقي علي نظرة ثاقبة..

- طلعي الكحلي من بينهم .. أو اقولك.. البني.

اندھشت من طلبه، فالألوان واضحة وضوح الشمس.
اقتربت منه وأمسكت الشرابات. ولوهلة ارتبكت.. في المحل
كان ضوء الشمس ساطع و اخترقهم بثقة. أما الآن غلا أعرف
لماذا بدوا متشابهين!

لم أرد أن يلاحظ جديارتباكي، فتكلمت بثقة خائني بعد
أول كلمة..

- دا البني يا جدي ودا... احم الكحلي.. وأكيد التالت هو
الأسود.

بنفس الهدوء سألني،

- أنت نظرك كام يا كرم؟

- الحمد لله نظري ستة علي ستة ليه يا جدو؟
لم يجيني؛ بل نادي علي جدتي والشغالة اللتين كانتا
تتهامسان خارج الغرفة. اقتربت الشغالة أولاً..

- نعم يا حاج؟

- طلعي الشراب البني من دول
أمسكت الشرابات بيدها تقلب فيهم، ثم أخرجت واحد
وقالت:

- دا.. ولا إيه رأيك يا حاجة؟

أمسكت جدتي الشرابات بدورها..

- لاء يا اعتماد مالك؟.. دا هو البني.

نظر لي جدي، وطلب مني إختيار الشراب البني.. الذي
كان بالطبع الشراب الثالث!

شعرت وقتها أن الدم هرب كله ليتركز في وجنتي.. كم
تمنيت أن تنشق الأرض وتبتلعني قبل أن يبتلعني غضب جدي
في صوت جهوري تكلم جدي..

- يا بني آدم ربنا ميزنا عن الحيوانات بالعقل. كان فين
عقلك ولا عينيك وانت بتختار الألوان دي ، لما أقول ٣

شرابات بـ٣ ألوان ماتجيهمش شبه بعض وبعدين في فرق بين
البي والبي المحروق

للأسف هنا تكلمت..

- يا جدو كان في شرابات زرقه وبلو بلاك وكمان هافان
وبي محروق.. وحضرتك طلبت مني ألوان غامقة قلت دول
أفضل

ضرب جدي علي الطاولة التي أمامه

- بلو بلاك دا يطلع لونه إيه؟

في صوت ضعيف..

- أزرق مسود

هنا طار صواب جدي فلم أدرك ما قاله ولا ما فعلته. كل
ما أتذكره جدتي والشغالة وهما تسحباني بعيدا..

لم يهدأ جدي إلا بعد إعادتي للشرابات وتغييرها.. والحمد
لله، في المرة الرابعة وجد جدي ضالته.

الجوازة دي مش لازم تتم !!

النحس هل فكر أحدكم في تلك الكلمة إن كانت فعلا موجودة؟

كيف نحكم علي شخص ما أنه منحوس؟ أو أنه ينحس نفسه ومن حوله؟

تلك قضية شائكة لم أحاول قبل اليوم أن أفكر بها؛ لكن ما حدث في خطبة أختي الصغيرة لا يمكن أن يكون طبعي أبدا!

لقد تقدم لخطبة أختي طيب شاب، لا يكبرني سوي بعام واحد، حديث التخرج، من عيلة... المختصر "لقطة" ليس به عيب إلا أنه من بلدة مجاورة لنا

يوم قدومه لنا أول مرة مع والديه، ومع دخوله أول خطوة في بيتنا، قطعت الكهرباء! ضحك والده بفعل الإحراج قائلا:

- خير.. والله خير.. دا ربنا مايقطعش النور علي حد إلا وغفر له! شوفتم خير إزاي؟!

لم يعلق أحد منا، وابتسمنا مجاملين لدعابته. ولم نأخذ هذه الواقعة في إعتبارنا لأن الكهرباء أحيانا تقطع عن المنطقة كلها. أما الغريب، فكان أن الكهرباء قطعت عن شقتنا فقط!

في ذلك اليوم اتفقنا علي موعد الخطبة الرسمي بعد شهر..
ولم يحدث!

مرضت جدة العريس، واضطررنا لتأجيل الحفلة حين
شفائها.

شفيت الجدة، لكن أُمي مرضت!

شفيت أُمي ... كسرت ساق أختي (العروس)!

شفيت ساق أختي، فدخلت امتحانات الترم^٩

وأخيرا حددنا موعد الخطبة بعد ٤ شهور من ميعادها.

كما قلت، العريس من بلدة مجاورة لنا.. والحفلة هنا. فهل
من المعقول أن يتحرك العريس من بلده بعد أذان المغرب؟!..
لكنه لا يرتاح للحلاقة إلا عند حلاقه الخاص!

- أنت فين يا هشام؟

- أنا خلاص خرجت من الجمرک ماتقلقيش. (ماهو احنا

في بورسعيد)

- دا المغرب أذنت!

- قتللك ماتقلقيش.

مازال امامه وقت؛ لكن لأنه خاف أن يتأخر، سار بسرعة
تفوق الردار. أوقفه الـ (كوموستبل)

- رخصك

- معلى حضرتك أصل النهاردة فرحى وتأخرت

- ابقى أخرج من بيتكم بدرى... رخصك

إنه أذان العشاء..

- أنت فىن ياهشام؟

- جاي.. أصل الـ (كوموستبل) وقفنى وسحب

رخصى.. معلى ساعة زمن وأوصل.

- الكوافيرة خلصت.. طيب أستاك فى بيتنا أحسن؟

- ماشى.

فى الطريق، (ضربت) إحدى عجلات السيارة، فقام

العريس الممام بتغيرها

- أنت فىن ياهشام؟

- العجلة ضربت معلى.. أنا بغيرها نص ساعة

وهوصلك.

بعد ساعة إلا ربع..

- أنت فىن يا هشام؟

- الاستبن ضرب .. شكلي كذا نسيت أصلحه المرة اللي
فاتت. معلش هركب أول مواصله وأجي أنا وماما وبابا.
- لاء خلاص .. قولي أنتم فين وكرم هيحي ياخذكم.
((يا عيني عليك يا كرم))

كانوا خارج الجمر كـ ٥ كيلو فقط. ذهبت لإحضارهم،
والحمد لله وصلنا سالمين .. أي نعم متأخرين علي الاستوديو
بثلاث ساعات، لكن لا يهم. فالأهم أننا وصلنا للأستوديو.
وأخيرا بعد بعض الصور.. ما أن خرجنا وأطلقنا
الكلاكسات - فرح بقي - حتى سقطت جدتي علي كتف
جدي في السيارة مغشي عليها!!!!

وتوجهنا جميعا للمشفى بدلا من قاعة الأفراح..

- خير يا دكتور طمننا

- خير... الحاجة شكلها نسيت تاخذ الانسلوين النهاردة
مع شوية انفعال حصلها غيوبة سكر لكن ماتقلقوش أنا علقت
لها محاليل. كام ساعة إن شاء الله واحتمال تروح معاكم
شعرنا بارتياح جميعنا لكن أمي أخذت تبكي وتبكي
وفجأة.. نظرت إلى هشام وأمه وأباه وصرخت:

- الجواز دي مش لازم تتم!!

أنا الحكومة

البيت هو مملكة المرأة. جميعنا نعلم هذا جيدا ... لكن هناك بعض السيدات يأخذن الأمر علي محمل الجدية، أكثر من اللازم، مثل خالتي سهام.

- أعلنت خالتي وبوضوح منذ أول يوم زواج أنها رئيس جمهورية البيت. الرئيس الأوحده الذي لن يتغير أبدا وبدون استفتاءات.. أما عمو عصام (زوج خالتي) فهو وزير الاقتصاد المسئول عن الموارد المالية لهذه الجمهورية الصغيرة.

- ظلت الأحوال في منزل خالتي هكذا طوال ٢٠ عام، هم عمر زواجهما، دون تدمير من الزوج.. لكن دوام الحال من المحال!

- في الشهر الماضي تقدم ابن أخت عمو عصام لخطبة ريم - بنت خالتي- فوجئنا جميعا برفض خالتي، علي الرغم من معرفتنا، ومعرفتها، لميل ريم وهيثم لبعضهما.. وكلنا كنا نترقب طلبه للزواج منها، فماذا حدث الآن؟!

- أنا أدري بمصلحة بنتي ... دا لسه مأخذش شهادته ولسه مشغلش ولسه مجبش شقة.. هو الجواز بقي لعب عيال؟!

- اعترضت ريم باكية

- بس أنا بحبه يا ماما

- صفعتها خالتي ناهرة لها:

- هي وصلت قلة الحيا لحد كدا! قال بتجبه قال! ...

أمشي علي اوضتك مش عايزة أشوفك قدامي.

- دخلت ريم المسكينة غرفتها باكية. وحبت نفسها في

الغرفة أسبوع. لم تخرج منها سوى للحمام فقط، ولم تكلم أحدا.

- عمو عصام لم يستطع أن يرى إبنته هكذا.. ولا حتى

خالتي، فلقد أرسلتنا تباعا لتكلم مع ريم ونحاول إقناعها بالخروج من عزلتها أو حتى الكلام.

- قرر عمو عصام القيام بثورة تصحيح - لكن بدون

معتقلات -

- أتصل بهيثم.. أبلغه موافقته علي طلبه.. و - منتهى

الجرأة - حدد معه ميعاد يأتي فيه مع أهله للاتفاق!!!

- عندما علمت خالتي، جن جنونها.. ثارت.. حطمت

بضع أكواب. لكن الزوج كان صامدا علي موقفه!

- كانت هناك نظرة تصميم في عينيه لم أرها من قبل.. لقد
جئنا جميعا علي صوت تحطيم الزجاج والصراخ. وما أن
وصلنا، حتى استشهدت بنا خالتي

- شايفين البيه بيلوي دراعي ... راح اتفق مع الناس علي
الخطوبة هنا في بيتي من غير إذني

- طار صواب عمو عصام وصاح: (لأول مرة أراه يصيح!)

- هي بقت كذا؟ آخذ منك الإذن؟ وبتقوليهها قدام
أهلك!... طيب من النهاردة مافيش كلمة في البيت دا إلا ليا

- وأخذته الجلالة، فرفع ذراعيه عاليا في مشهد درامي
يستحق عليه الأوسكار، وأستعار بعض الكلمات من أحمد
السقا حيث قال..

- من النهاردة أنا الحكومة أنا الحكومة

- كنت أريد أن أصفق له متأثرا، لولا أنني تذكرت أن ما
يحدث ليس فيلم بل حقيقة لا أدري ماذا ستكون توابعها في
الساعات القادمة..

- صدمت خالتي مما قال زوجها.. صمتت قليلا .. نحن
أيضا كنا صامتين، فماذا يمكن أن يقال الآن؟!.. ثم وقفت

علي قدميها فجأة متحفزة، لتبدأ جولتها، لولا أن استوقفها
جدي..

- مكانك! كفاية كده

- صمت الجميع مترقبين وقلقين من القادم.. لكن جدي
عاد فقال بصوت خفيض:

- لما تهدوا نبقي نتكلم

- بس يا بابا

- بإشارة صغيرة من يده ابتلعت باقي كلماتها.. قال هو:

- جوزك ماغلطتش. هو هنا راجل البيت، وأنت زودتيها
معاه وقدامنا ... بينك وبينه أنتم حرين سوا.

- بتلك الكلمات البسيطة احتوى جدي الموقف.. أما ما
يحدث .. فسنعرفه بعد قليل .. !

ثورة الفلانتين

- الفلانتين ... يوم كتيب جدا علي الرجال. ليس هناك رجل يعرف سر هذا اليوم المزعوم ... كل الفتيات يهتمن به ، يحضرن له طوال العام.. ماذا ستشتري ... ماذا سترتدي ... أين ستخرج.. وأهم من كل هذه الأسئلة ما التلميحات التي سترسلها لفتاها من أجل الهدية.

- ثم في هذا اليوم فرض علينا أن نرتدي الأحمر ... -أحمر أتصدقون؟! - إنني وبرغم كوني أهلاوي أصيل لم أرتد الأحمر يوما ولا حتى في شكل - اسكارف - ... يا الله علي تلكن النسوة اللاتي يتحكمن في حياتنا نحن معشر الرجال ... أحمد الله كثيرا أنني لم أضطر لارتداء الأحمر بعد.

- في عائلي لم يكن للفلانتين نصيب من احتفالاتنا إلا في الخمس سنوات الماضية فقط عندما قررت إحدى بنات الجيل الثالث - الأحفاد - الاحتفال به مع خطيبها الذي - وللأسف - وافق علي ارتداء بلوفر أحمر، ثم قدم ومعه دبدوب كبير أحمر يحمل في يده برواز لصورته - يهديها صورته!! ... يع - وعلبة شيكولاتة كبيرة. منذ ذلك اليوم الملعون أصبحنا نحتفل

بالفلانتين. فقد غارت السيدات منهما وطالبن الأزواج بالهدايا
رمزا للحب!

- نظرت جدتي لجدي نظرة حاملة رومانسية وهو يشاهد
التلفاز..

- حاج..

- جدي في نفاذ صبر - لأنه يعلم جيدا أن تلك لنظرة
والصوت الرقيق يتبعها طلب كبير -

- نعم يا حاجة

- قولي زوزا.. زي زمان

- حاضر... نعم يا زوزا

- ثم أدار رأسه ثانيا للتلفاز ..

- أنت جبتي إيه معاك

- دون أن ينظر لها ..

- كل اللي كان مكتوب في الورقة يا حاجة ..أ.. أقصد
زوزا

- قامت من مكانها وعدلت هيئتها، ثم اقتربت منه وهي
تخفي شيء خلف ظهرها

- تَو...تَو .. تَو.. ما أقصدش طلبات البيت.. أقصد جبتلي إيه عشان النهاردة

- فرك جدي رأسه مفكرا ..

- النهاردة ... هو النهاردة إيه ... آه السبت ماله بقي

- أخرجت يدها من خلف ظهرها لتعطي جدي لفة حمراء صغيرة.

- نظر جدي بدهشة لتلك العلبة!

- إيه دا يا حاجة؟

- قلنا إيه.. النهاردة أنا وزوا

- ماشي.. زوزا.. إيه دا؟

- في غنج أجابت:

- افتحها وأنت تعرف

- ثم عادت لتجلس فهي لا تستطيع الوقوف طويلا. فتح جدي العلبة ليجد بها سبحة فضة طويلة آيه في الجمال، ومعها كارت مكتوب فيه:

- {{Happy Valantine}}

- ودا ايه اللي مكتوب في الكارت يا حاجة؟

- إقراه وأنت تعرف
- دا بالانجليزي مش مهم مكتوب إيه.. تسلمي يا حاجة السبحة جميلة.
- والتفت يكمل مشاهدة التلفاز. احترقن وجه جدي غضبا..
- أنت مش ناسي حاجة
- لم يجب..
- حاج!
- دون أن ينظر لها..
- نعم
- أعادت السؤال، وكانت إجابة جدي سلبية..
- قامت جدي من مكانها، ودخلت غرفتها صافقة الباب خلفها. تعجب جدي مما حدث، لكن لم يفعل أي شيء. وعندما غابت بداخل الغرفة، دخل خلفها، ليحدها تبكي أشد بكاء..
- اختلع قلبه من منظرها.. سألها مرارا عما أصابها.. ولم تجب.

- طيب بس قولي مين اللي زعلك وأنا أطلع عينه؟
- ولا رد سوي البكاء.
- خرج جدي من الغرفة محتارا ، وجد همسة ابنة خالي التي قفزت في حضنه وبعد أن قبلته..
- ها.. إيه رأيك يا جميل في الهدية؟
- هدية! ..آه حلوة ... متعرفيش من جه النهاردة هنا؟
- محدش.. ليه؟
- أبعدھا جدي عنه وذهب في اتجاه التليفون
- نيتك يا ستي بتعيط بقالھا شوية ومش عارف ليه.
- يمكن هديتك ماعجبتھاش؟
- جدي في دهشة ..
- هدية إيه؟
- هدية الفلاتين. كل يوم حب وأنتم مع بعض إن شاء الله..
- جدي في استنكار:
- فلاتين إيه.. هو إحنا عيال!.. روعي ذاكري ولا أعمليلك حاجة مفيدة.

- ردت بسخرية..
- أمال حضرتك فاطر السبحة جياالك بمناسبة إيه؟
- هو لازم يبقى فيه مناسبة
- أحاطت همسة كتف جدي بذراعها..
- - خلاص يا جميل أنا عرفت نينا مالها.
- وضعت فمها في أذنه لتفهمه القصة وتنصحه بما عليه
- فعله من أجل جدتي
- أنت متأكدة؟ أصل عمرها ما حصلت و.....
- قطعت همسة كلام جدها..
- أسمع كلامي تكسب
- هز جدي رأسه
- - أمري لله ... حسي الله ونعم الوكيل. فلانتين إيه في
- ستنا دا!
- خرج جدي من المنزل، ثم عاد بعد ربع ساعة حاملا
- باقة كبيرة من الورد الأحمر

والله أسفاه !!

كشف المؤامرة

- لكل عائلة عاداتها. وبالطبع عائلي لها عاداتها الخاصة جدا. فنحن عائلة تحترم الاحتفال، و(تلكك) حتى تحتفل.

- ليس هناك مناسبة لا نحتفل بها.. وكذلك فلكل مناسبة طقوس معينة للاحتفال.

- ومن أهم تلك المناسبات، رأس السنة الميلادية. وذلك لأنه يصادف يوم مولد جدي. وبناء عليه، يطرق كل أفراد العائلة الكريمة باب جدي محملين بما لذا وطاب من الأطعمة.

- وهناك طبعاً تخصصات..

- أُمي مختصة بالبشاميل وورق العنب.. خالتي بالمحمرات من سمبوسة وبوفتيك وخلافه.. الكناين بالحلويات والسلطات.. البنات الصغار تعتنين بتنسيق السفرة في أهلي صورة.

- تسألون عن جدي؟ ... إنها الـ (ريسة) ذات الكلمة المسموعة والتوجيهات. كما أنها مسئولة الأرز بالخلطة، وجميع أنواع المشروبات من ساخن وبارد.

- علي الرغم من أننا ننتظر هذا اليوم طوال العام، لما له من معزة في قلب جدي. ولأن من تبعات هذه المعزة أن طلباتنا جميعها دون استثناء مجابة في هذا اليوم.

- ومع ما لهذا اليوم من شكل حميمي مميز، إلا أنه لا يخلو أبدا من المؤامرات. حيث يعمل الجواسيس الصغار - الأحفاد - لحساب جدتي التي تأمرهم باستطلاع المطبخ بين حين وآخر وتبدأ تهدئة النفوس كيف هذا؟

- تعالوا معي لآخر احتفالية برأس السنة..

- طنط ناهد - تحدثنا عنها مسبقا - ممتازة في صنع البسبوسة. وكما نعلم جميعا (الحلو ما يكملش).. أن لديها عيب خطير. فهي دائما سكرها زيادة، وجدتي عندها مرض السكر - شفاها الله وعافاها - .

- قبل كل مناسبة، تقوم جدتي بعمل تنبيه عام، والمقصود منه بالطبع طنط ناهد، أن كمية السكر والعسل المضافة للحلويات تكون معتدلة. ولكن في كل مناسبة تكون صينية البسبوسة أو الكنافة (جازعه)..! و بالطبع، تشن جدتي الحرب علي الكنة المسكينة. حتى افتضح سر العسل هذا العام!!

- طوال نهار يوم الاحتفال، تأتي كل واحدة بما أعدت من مأكولات لمطبخ جدتي. وقيل منتصف الليل، تبدأ مراسم الاحتفال بتحضير السفرة وقلبي ما يستوجب القلي والتحمير.

- هذا العام اختلفت الأمور قليلا.. فطنط ناهد لم تأتِ
بالكنافة والبسبوسة في النهار، بل أتت بها بعد صلاة العشاء
ببعض الوقت. وذلك لأنها أعدت صينية كانت زائدة السكر،
فخافت أن تدخل بها علي جدتي، فأعدت واحدة أخرى.

- أثناء انشغالنا بالاحتفال - الهیصة وخلافه من لعب
الورق، طاولة ، دومينو، وغناء البنات - لاحظت جدتي أن
طنط سلوى زوجة خالي رفعت ليست معنا. ولأن جدتي
مكاراة جدا، بعثت أحد الجواسيس - أحمد أخي - ليتفقدھا.
وهنا بدأ سر العسل ينكشف، لقد وجد طنط سلوى في
المطبخ فصاح بصوت عالي

- هنا يا نينا ... طنط سلوى في المطبخ.

- قفزت طنط سلوى من أثر المفاجأة.. وسكبت علي
نفسها العسل!!.. حاولت أن تسكته، لكن الكلمات السحرية
كانت قد قيلت.. الجميع يقف علي باب المطبخ وتلبست طنط
سلوى بالجرم المشهود!!

- بدأت جدتي المحاكمة الفورية

- أنتِ بتعملي إيه هنا؟

- في توتر أجابت:

- ولا حاجة ... بشرب
- أكملت جدتي
- وإيه اللي علي هدومك دا؟ ... غسل؟
- دخلت طنط ناهد المطبخ.. وجرت إلى صينية البسبوسة.. ضربت علي صدرها هاتفة:
- إيه دا؟
- جميعنا في صوت واحد:
- إيه؟
- البسبوسة..... البسبوسة غرقانة غسل!
- اتجهت أعيننا جميعا لطنط سلوى دون كلام.. صدر الحكم بإدانتها دون محاكمة فالأمر واضح وضوح الشمس..
- مالكم بتبصولي كدا ليه؟
- في هدوء مخيف تكلمت جدتي كأنها تحولت إلي جورج قرداحي:
- أنا شفت الصينية لما جت.. كانت شاربة العسل بتاعها ... هدومك عليها غسل وإيدك.. أقول أكثر وللا كفاية؟
- أ.....أ....

- جاوي
- أنا.. لاقيت العسل جنب الصينية ... قلت أشيله لايتكب
وا... بس لما أتكلم أحمد اتخضيت ووقعت علي نفسي العسل.
- متأكدة؟
- أصبح وجه سلوى أصفر من الليمون..أخرجت لسانها
تبلل شفيتها..
- أقصد وقع علي الصينية وعليها.
- لم تتمالك ناهد نفسها، فأمسكت سلوى من ذراعها..
- - يعني أنتي اللي كل سنة تعمل فيا العملة دي
حرام عليكى يا شيخه
- أجهشت سلوى في البكاء، فتدخل خالي رفعت:
- سبي إيدها يا ناهد عيب اللي بتقوله دا.
- ارتمت سلوى علي صدر جوزها تبكي وهي تقول:
- أنا كنت بشيل العسل يا رفعت مصدقني مش كدا
- في تعاطف صادق أجاب خالي:
- طبعا يا حبيبتي ومش أنا بس كلنا ...
- ثم نظر بحدة إلي ناهد:

- وناهد كمان هتعتذرلك علي سوء ظنّها دا. وعلّسي
الطريقة اللّبي عاملتك بيها.

- تدخل خالي جلال في هدوء:

- مافيش داعي للكلام دا يا رفعت. كلنا شففناها وهي
متغطية غسل وكمّان كلامها مش منطقي مايدخلش عقل غلّة.
يعني سلوى هي اللّبي المفروض تعتذر لناهد.

- من فضلك يا جلال بلاش تتدخل بين الستات.

- قال أحد المقاريض الصغار ببراءة

- بس حضرتك يا خالو اتدخلت. هو حضرتك ستات؟

- في انتصار واضح قال خالي جلال:

- جابوب بقي..

- تحولت الخناقة من النساء للرجال.. جدي انسحب من
الموقعة معترضا علي الأسلوب الذي اتبعه خالي في معالجة
الأمر.. جدي وقف في النص بين الخالين حتّى لا يتقاتلا بسبب
النساء.. الكتتان وقفت كل واحدة خلف زوجها تسانده فيما
يقول..

- أما الأطراف الأخرى.. فيتفرجون في صمت..

- بعد نصف ساعة من الجدل تدخل جدي حاسما الموقف.
صفق بيديه عاليا فصمت الجميع!
- بذمتكم مش مكسوفين من نفسكم؟ غيرة نسوان تخليكم
تاكلوا في بعض من غير ما تعملوا حساب لوجودي؟
- ثم صرخ فينا جميعا بغضب:
- كل واحد منكم علي شقته..... جاتكو البلا
- ثم وجه الكلام لجدي..
- ايه الخلفة اللي تقرف دي.... يا ساتر
- صاحت جدي:
- أنا عيالي زي الفل كله من دول
- وأشارت للكتتين المعنيتين..
- وكانت تلك الكلمة ثاني نقطة تحول بعد كلمة المقروض
الذي (فتن) على طنط سلوى.. وتحولت الخناقة إلى حرب
أهلية .

أسرى حرب

- بعد ليلة رأس السنة، تحولت كل شقة في العمارة إلى
جهة حربية. منها المستقل، ومنها المتحد..

- أعلنت جدتي الحرب علي الكناين مرة أخرى. وجدي
أعلن الحرب الباردة علي أبنائه لإفسادهم يوم مولده. والكناين
أعلن الحرب علي بعضهن..

- وتحول الأمر إلى حرب كارثية، عالمية، نووية، مميتة.
وبالطبع لم يكن هناك حزب محايد مثل العهد السابق. فلقد
انحاز كل زوج في الجبهة لزوجته، وحاربا جانب إلى جانب.
أليس الزواج شراكة في السراء والضراء؟!

- أصبح الجو العام خائق.. ليس هناك متنفس لأحد.
وكعادة كل الحروب العائلية، كنا نحن - الأحفاد - ضحايا
المجازر. فلقد صدر مرسوم رسمي بمنع الاختلاط، ليس بين
الشباب والصبايا، لا بل بين أبناء فلان وأبناء علان!

- ولأن الحب كالحرب له ضحايا أيضا. وأحيانا يكون
ضحايا الحب هم ضحايا الحرب.. فقد تم أسر كل من محمد
جلال عبد الرحيم، وهمسة رفعت عبد الرحيم لقيامهما بالخيانة

- محمد! أنت بتعمل إيه هنا؟
- ارتبك محمد ، نظر لهمسة.. وعندما رآها دامعة العين من الخوف، تشجع. لم يستطيع قلبه الصغير رؤية دموع همسة، فأراد إخماء الأمر قبل أن يصل لوالديها..
- ولا حاجة كنت راجع مع همسة من الدرس.. حضرتك عارفة أن الوقت متأخر عيب ... ميصحش ترجع لوحدها.
- مصمست طنط ناهد شفتيها..
- وأنت بقي حامي حما البلاد يا واد وللا إيه؟ ما عندها أبوها ولا أخوها وبعدين هي لو ك....
- قطع محمد كلام أمه بعد أن تقدم ليقف أمام همسة في مشهد بطولي - يحتاج تصفيق من نوع العالي -
- ماما لو سمحتي.. حضرتك عارفة أن من البداية خالو رفعت ماوافقش علي معاد الدرس دا إلا عشان هي معايا وإحنا مش لسه هنعرف همسة النهاردة
- كان صوت محمد عالي من أثر الانفعال، فتدخلت أمي..
- عيب يا محمد ترفع صوتك علي مامتك.. حتى لو كان عندك حق !
- التفتت طنط ناهد لأمي ..

- - بقولك ايه يا أبله، محدش يدخل بيني وبين ابني.
- تدخلت جدتي..
- ولا حد يكلم بنتي كدا
- أمسكت طنط ناهد محمد من ذراعاه ودفعته ليطلع أمامها...
- بس لما يجي أبوك وهو يعرف شغله معاك.
- جاء صوت من خلفهم:
- أنا جيت.. خير؟
- ارتعدت أوصال محمد.. فبرغم أن خالي لا يرد لزوجته كلمة؛ إلا أنه شديد جدا علي أبنائه!
- في إيه يا محمد؟ مزعل ماما ليه؟
- أجابت ناهد في حزم:
- خلاص يا جلال في بيتنا نتكلم علي راحتنا
- وجهت نظراتها لجدتي عند النطق بهذه الكلمات!
- وانتهى النقاش، واقتيد محمد وهمسة لمواجهة مصيرهما المحتوم كخونة، فتم قطع الموارد المالية عن محمد، وأصبح خالي من يوصله لدروسه ومدرسته

- أما همسة المسكينة، عندما علمت أمها بما حدث، قامت
بصفعها بقوة أسقطتها علي الأرض، لأنها جلبت العار
للأسرة!!!

- لا ليس لعودتها الساعة العاشرة مساء؛ لا بل لأنها فضلت
أن تسير - وبكل وقاحة - مع محمد بدلا عن السير وحدها
للمنزل.

فتى الشاشة الأول

- التنافس بين الأحفاد دائما وأبدا لا ينتهي. هناك علي الدوام من يريد الظهور علي السطح ولو لبعض الوقت. وعندما يكون هناك خمسة عشر حفيداً، فمن الصعب جداً أن يأخذ جميعهم الأضواء.. وتظل المنافسة لا تنتهي.

- دائما كنت خارج هذه المنافسة لأنني الحفيد الأكبر ، أول من تكلم ، أول من دخل المدرسة ، أول من أصبح روش طحن ، كان الصغار يلجئون إليّ عندما تستعصى الموضة عليهم كما أنهم لقبوني بفتى الشاشة الأول أتعرفون هذا الشعور؟.. أن تكون رشدي أباطة !

- لست بحاجة لأن أقول أنا هنا .. كم كان الوضع مريحاً جداً بالنسبة لي. كنت أنظر لهم - الأحفاد - من برجى العالي وأشفق عليهم ... وها أنا أستخدم صيغة الماضي.

- للأسف وجدت نفسي داخل المنافسة، بعد أن سحبتني لها ذلك الملعون الصغير محمود ابن خالي مراد.. لو مكنتني أحد من رقبته كنت أعدمته رمياً باللبان

- مازلت أذكر هذا اليوم جيدا، بحكم أنني بالغ راشد لا بد أن أعمل. ولأنني أعمل، لم يكن لدي الوقت الكافي لأجلس مع أبناء خالاتي أو أخوالي. ومع مرور سنة علي هذا الوضع، تغيرت مفاهيم كثيرة.. لم يعودوا يسألوني عن شيء؛ بالعكس جاء اليوم الذي يسديني فيه أحدهم النصيحة حتى أصلح من هيئتي !

- كرم

- أهلا أهلا محمود ازيك يا ابني.... واحشني فينك
- موجود أنت اللي فينك؟ نلمحك داخل أو خارج.. لا عدت بتعدي ولا بتسلم..... اللي عطاك يعطينا.
- والله يا حوده الشغل هاددي.. يادوب لما أروح لو فيا حيل بعد ما أكل لقمة أنزل أشوف صحابي شوية.
- هز محمود رأسه أسفا عليّ

- ربنا معاك.. بس يعني ما عندكش وقت حتى عشان تخلق؟

- تحسست شعري بيدي مازال ناعم وطويل قليلا - أنا طوال عمري اترك شعري طويل قليلا ... ما هذا الذي ... !!؟

- ماله شعري يا محمود؟

- نظر لي بعينه نظرة جانبية تفحصية ..

- يعني.. طويل شوية من قدام.. وطول دا مش ماشي مع السوالف.. ويبقي أفضل لو تصبغه بدل مالونه باهت كدا.

- أصبغه ...؟!!

- آه خليه عسلي.. يبقي أحلي مع لون بشرتك، أو علي الأقل أعمل كام خصلة بيضا فيه

- أنت أهبل يلا!.. أنت عايزني أشيب نفسي بنفسي؟!.. طيب أستني لما أتجوز وهو هيشيب لوحده.

- مال جانب فمه الأيسر في تنغص قبل أن يقول:

- أنت قديم أوي..... ما أهوه

- أوما برأسه لأسفل ليري بي بعض الشعيرات البيضاء والصفراء..

- إيه دا؟ أنت شفت نفسك في المراية وأنت لسه صاحي من النوم؟ ها ها ها

- ضحك محمود معي ومد يده لي..

- قشطة

- أجببت بتلقائية جدا بما كنت أقوله دائما عندما يقال قشطة..

- اتجوزت

- سحب محمود يده، وهز رأسه أسفا مرة أخرى..

- مش بقولك قديم أوي .. أنت من أيام فحت البحر يا راجل

- لو أحد قذفني بدلو ماء مثلج لرآه بخارا .

- ليه يا عم الجديد؟

- الوقت لما أقولك قشطه، تقول ومري .

- صعقت فعلا من التطور ..

- تصدق أنا فعلا قديم ... قوم ياض علي بيتكم..

- لم أستطع في هذه الليلة النوم مطلقا. فلقد أشعرتني هذا

الفصل الصغير الذي لم يتجاوز السابعة عشر بأني عجوز ، طوال الليل وأنا أحدث نفسي ..

- ما أنا برضه أكبر منه بعشر سنين

- وأعود لأقول:

- وماله يعني لسه في عز شبابي.

- شباب مين بقي دا أنا طلعت قديم من أيام فحت البحر... فحت البحر.... أنا !

- لم أستطيع تحمل الجدل النفسي أكثر من هذا.. ارتديت ملابسي، وذهبت للحلاق..

- عندما عدت للمزمل، قرابة منتصف الليل، كنت قد عدت لمكانتي مرة أخرى.

- مررت علي شقة خالي مراد - بالصدفة طبعاً - لأسأله عن أي شيء. فتح لي محمود الباب، وصعق بما رأي.. لقد خلقت شعري علي واحد، رسمت لحيتي "دوجلاس"، رفعت سوالي وقصرتها.. وارتديت "أيس كاب" علي رأسي؟

- نظرت في المرأة القريبة من الباب عند دخولي، وابتسمت إعجاباً بحالي.

- لكنني أدركت أنني حتى لو كنت قد أثبت أنني مازلت فتى الشاشة الأول، إلا أنني دخلت أرض المنافسة...!

مش منظر

البرستيچ! ما معني تلك الكلمة حقا؟ ألها فعلا معني في
القاموس أم أن هناك سيدة ما، في عصر ما، قررت أن تعذب
الرجل فاخترعت هذه الكلمة ؟!!!

- حبيبي فين العربية ... لا لا أنا مركبش تاكس..
برستيحي!

- إزاي أروح النادي بالـ (شيميس) دا.... دا مش
(سينيه) أنت عايز برستيحي يتهز؟!

آه من ذلك الشبح الذي طارد وعذب الرجال، فارضا
عليهم أرزل القيود.

وإذا أراد الرجل أن يحافظ علي برستيچ زوجته، فعليه أن
يكون مبتسما دائما ، مجامل - في حدود طبعاً- ، أنيق ، ولا
يمل أبدا من التسوق الأسبوعي معها.

وهناك أيضا بعض الموانع والمحظورات، فلا يكون عصبي ذو
صوت عالي و لا يأكل حتى لو كان جائعا.. كيف هذا؟
سأروي لكم وأنتم الحكم.

دخل خالي مراد وزوجته ميادة علي جدي وجدتي ذلك
اليوم وهم في حالة من الغضب.. لم يتكلما، لكن وجهيهما
حكيا الكثير..

- مالك يا ابني أنت ومراتك شكلكم كدا مش مبسوطين؟
أشاح خالي بوجهه ناحية التلفاز.

- طيب قوليلي أنتي يا بنتي!

- يرضيك يا بابا أن مراد يخرجني قدام الناس؟

نظر جدي لخالي وهو يجيب:

- لاء طبعا مايرضينيش.. بس هو إيه اللي حصل؟

كانت تلك إشارة لخالي حتى يتكلم، لكنه آثر السكوت،
فأكملت هي:

- حضرتك عارف أن النهاردة كان فرح أختي؟

- عارف.

- فيها حاجة لما أطلب من مراد طلب صغير أنه يكون ذوق
وما يخرجنيش؟

تدخلت جدتي فورا:

- ومن امتي كان مراد مش ذوق؟!!

نظر خالي لزوجته نظرة انتصار.

- أنا ماقلتش كدا يا طنط

(العجيب هنا أن ميادة تقول لجدي بابا وتقول لجدي طنط)

- أنا قلت أني طلبت منه طلبت صغير ليوم واحد،
ومانفذوش برغم أنه وعدني.

تدخل جدي..

- طيب يا بنتي قولنا بس ايه اللي حصل.

بكت ميادة وهي تحكي لجدي..

- يرضيك يا بابا أنه يخرجني قدام الناس ويزعقلي ويشدني
من أيدي؟

رفع جدي رأسه في ذهول ونظر لخالي شزرا..

- هو أنت عملت كدا؟ ... مش عيب عليك؟ بنت الناس
عندك أمانة المفروض تصونها.

قام خالي من مكانه في هدوء واتجه للشباك وهو يقول:

- قوليله أنا ليه زعقت وشديتك من إيدك؟ وطبعاً الشد دا
معناه الحرفي والحركي اللي حصل أني مسكت إيدها زي الحبيبة
وسحبته علي العربية عشان نتكلم.

قالت ميادة والدموع تتساقط من عينيها:

- شايف يا بابا بيقول سحبتها. هو أنا بقرة هيسحبي؟

- نقي ألفاظك يا مراد ... احكي أنت يا ميادة وقولي لي إيه
اللي حصل وخلي مراد يسحبك، أقصد يشدك علي العربية؟

- أكل يا بابا.. أكل!

في عدم فهم حقيقي نظر جداي لبعضهما، ثم لخالي الذي
تكلم بهدوئه المعتاد:

- فعلا يا بابا دا حصل ... ساعني غصب عني ماقدرتش
أقاوم وضعفت ... أيوة ضعفت و..

ثم أكمل بصوت عالي:

- أكلت!

- من فضلك بلاش أسلوب التريقة دا ... وبعدين أنا
قتلتك قبل ما ندخل أن البوفيه دا للضيوف.

- هو أنا مش ضيوف؟ ... وفرضنا أي مش ضيوف حصل
إيه؟!

- حصل أنك روح ... مش قادرة أكمل..

وأكملت وصلة البكاء ، فنظر جدي لخالي ..

- طيب كمل أنت عشان أفهم

- كل الموضوع أن الهامم قالتلي ما تاكلش في الفرح..
الكلام دا الصبح ولأني رجل وحش كنت طول النهار ولحد
معاد الفرح من عند الكوافير لبتاع الورد للكوافير مرة تانيه
وبعدين الاستوديو.. كل دا من غير أكل. ولما فتح البوفيه في
الفرح رحت وجبت لنفسي زي زي غيري طبق!

قالت ميادة من بين دموعها:

- بدمتك ماكلتش؟ مش أنا اديتك في الكوافير باكو
بسكوت؟ وبعدين اللي يجيب طبق يـ لاء مش عايزة
افتكر.

جدي في صبر نافذ:

- قولي يا بنتي جاب ايه؟

- جاب تورته كاملة يا بابا، وكمان فخدة من بتاعة
الديك. وللا طبق السلطة.. كان مليون علي الآخر .. المنظر
كان وحش خالص، أنا كنت في نص هدومي.

تدخل خالي موضحا:

- يعني أنا جبت دا كله لنفسي؟ مش كان فيه خمس
أشخاص غيري أنا وانت علي التريزة؟!

- من فضلك ماتحاولش تبرر موقفك.

يسأل جدي:

- أmaal زعق أمي وشد أيدك؟

- جاوبي بقي

- لما ... هيء .. هيء.. قتلته أن دا مش منظر وأنه كدا
بيخرجني، قام مزعق ووالي تعالي وشدني من إيدي قدام الناس.
قال إيه.. شدني عشان يخرجنا نتكلم بره. هو يعني لو قال لي
تعالي ماكنتش هاجي؟ ... بس هو كدا دايمًا بيحب يخرجني
ويضيع برستيحي قدام عيلتي.

قاوم جدي ضحكه..

- دا ينفع برضه يا مراد؟ مش كنت تجيب عينات أكل
واللي عايز يبقي يجيب لنفسه؟ .. لاء لاء يا ابني هو أنا رببتك
علي كدا!.. لما تكون جعان تاكل وتأكل اللي معاك
كمان!... أنا مصدوم فيك..

وسط ضحك ثلاثي بين الجددين وخالي، قامت ميادة إلي
شقتها وقد اختفت دموعها، ليحل محلها غضب عارم من تلك
العائلة التي لا تقدّر البرستيح!!

عشاء رومانتيكي

المسلسلات المدبلجة من أكثر الأشياء خطرا علي الحياة الزوجية. من يكون هذا المهندس الذي حطم أحلام العديد من الشباب، ورفع آمال وتوقعات النساء؟! أمن المعقول والمنطقي أن يفعل الرجل كل هذا لإرضاء زوجته؟! ... لماذا؟ هل هو انتقام؟ ... من أين أتوا هؤلاء الرجال؟ كيف يكون الرجل بهذا الصبر، ليركض خلف زوجته من هنا وهناك؟! اليوم يتقمص دور جرسون وبعد ذلك مراكي و..... أليس له عمل؟! ... هراء.

خالتي سهام مازالت معلنة الحرب الباردة على زوجها "عمو عصام" من يوم أن أجبرها علي قبول "هيثم" ابن أخيه كعريس لريم .

تلك الحرب مستمرة منذ حوالي أسبوعين.. أو شك الرجل علي الجنون... فهي لم تترك له شيء ليشتكي منه ، لم تقصر في حق المنزل ، طلباته الشخصية من كي الملابس، أكل يجبه وخلافه.. كما أنها مهتمة جدا بأناقته داخل المنزل حتى أنها لا تزيل المكياج إلا للوضوء ثم تعود لوضعه مرة أخرى.. لا تعترض علي شيء مطلقا ولا تطالبه بشيء

إنه في الجنة ، هذا حلم كل رجل ... أليس كذلك .. بالعكس كل هذا يحدث وهي لا تخاطبه بكلمة واحدة ، لا ترد

عليه ولا تتواجد معه في مكان واحد أبدا ، الرجل لم يعد يستطيع التحمل أكثر من ذلك.

ريم وهيثم شعرا بالذنب لما حدث، فكرا في ألف حل للمشكلة ولم تجد أي من حلولهم. وفي يوم جاءت تلك الحلقة في ذلك المسلسل الذي جهز فيه الرجل عشاء رومانتكي لزوجته وأتي بعازفة كمان ، ورود ، شموع لعمل طريق وصولها للطاولة المزينة .. أيعقل هذا؟ .. محال!

المهم، شاهدت ريم تلك الحلقة وقررت عمل عشاء رومانتكي لأبويها علي أمل أن تتم المصالحة. أخذت من جدي مفتاح السطح - في السر طبعا حتى لا تعلم اعتماد وتفسد - أخذت من خالي مراد طاولة المطبخ وكرسين.. لماذا خالي مراد؟ لأنه يسكن في الطابق الأخير وبذلك لن تشعر خالتي بانتقال الطاولة والكراسي

بعثت العبد لله لشراء العديد من الشموع الكبيرة ذات الروائح الزكية ، ورود ، أحبال نور ملونة صغيرة - صيني -

كل هذا جميل ... المشكلة تكمن في كيفية مرور كل تلك الأشياء تحت أنف اعتماد دون أن تراها.

خطرت لزهرة - أختي - فكرة وبدأنا التنفيذ. افتعلت زهرة مشكلة مع أمي - المتواطئة معنا بالطبع - علا الصباح

عندنا فأسرعت اعتماد طبعا لبيتنا لترى ما هناك وحملها
جدي

- مالكم يا ولاد؟ فيه إيه صوتكم عالي؟

تكلمت أمي بجرارة :

- انبهدي يا ماما علي مقصوفة الرقبة دي.

- سن فضلك يا مامي ماتقوليش مقصوفة الرقبة.

- لأ مقصوفة الرقبة وأقول اللي أنا عاوزاه.

- دي مش طريقة أنا ما عدتش صغيرة.

ظل التناوش بين أمي وزهرة علي هذا المنوال ، جدي
واعتماد لم يفهما شيء

تساءلت جدي ..

- بس لوحده فيكم يقول في إيه؟

في تلك الأثناء بدأ الفريق الثاني في العمل. كما أن خالي
قد انضمت لجدي واعتماد في محاولة لفك الاشتباك بين أمي
وأختي، اللتين برعتا فعلا في تمثيلهن، واستطاعتا وبكل جدارة
إنهاء الجميع وبالأخص المدعوة اعتماد.

بعد حوالي ساعة أعطيت إشارة فك الاشتباك لزهرة برنسة
علي تليفونها المحمول.

خالتي تحايل زهرة:

- يا زهرة يا حببيتي قوليلي بس إيه اللي حصل انتي شايفة
حالة أمك بقت ازاي

تكمل جدتي:

- ربنا يهديك يا بنتي بس فهمينا ..

وتنظر لأمي ..

- طيب أنتِ قوليلي

غمزت زهرة لأمي ..

- البنت دي ماعدتش بتسمعلي كلمة خلاص.

تبكي زهرة وتجلس أمام أمي علي الأرض ممسكة يدها في
تضرع ..

- عندك حق يا مامتي أنا أسفة.

تسأله أمي لتكمل المسرحية :

- ولو اتكرر تاني ؟

تقبل زهرة يد أمي ..

- ولا عمري هكررها تاني ياست الكل ... ساعيني!

تقبل أُمي رأس زهرة..

- سامحتك.

قامت زهرة واحتضنت أُمي في وسط نظرات ذهول
الحضور!

وجاء موعد الجزء الثاني من الخطة..

طرق شديد علي باب شقتنا ، قامت أُمي لتفتح ، دخل
خالد ابن خالتي سهام يلهث

- ماما الحقني ريم

انتفضت خالتي من مكانها

- مالها؟

- مش عارف أنا لقيت الورقة دي علي السرير بتقول ...

شدت خالتي الورقة من يده ونظرت فيها ، ابيض وجهها
من الفرع ،أسرعت تركض لشقتها والجميع خلفها. لم تجدها
في البيت.. نظرت لخالد الذي أشار بإصبعه إلي أعلي دون أن
يتكلم..

صعدت الدرج مسرعة ، عندما اقتربت من السطح سمعت
موسيقى نظرت لخالد في رية ، دفعت الباب بيدها ودخلت..

كان السطح مضاء كله بأنوار متألثة - قلنا صيني - أمامها طريق من الشموع الصغيرة الذي يؤدي في النهاية لطاولة عشاء مزينة بالورود والشموع ومفرش حريري أحمر.. عمو عصام يقف عند الطاولة مرتديا بدلته السوداء ومصفف شعره عند الحلاق ، تقدم نحوها مبتسما ومد يده..

- تسمحي لي بالرقصة دي؟

في ذهول مدت يدها لزوجها الذي أخذها وراقصها.. كل هذا وخالتي لم تتكلم كلمة واحدة كأنها تحاول أن تستوعب ما يحدث واحدة واحدة.

وقف الجميع مبتسما يشاهد ما يحدث ، لف عمو بخالتي في حركة دائرية لتقع عينيها علي خالد وريم ، دفعت زوجها دفعة بسيطة لتخلص نفسها منه وذهبت لتمسك ولديها من رقبتهم

- أنتم ... أنتم كنتو هتموتوني يا...

وضع زوجها يده علي كتفيها وأدارها ناحيته

- انسيهم شوية وخليكي معايا

طاوعت زوجها ورقصا قليلا ثم أخذها للطاولة ساحبا الكرسي و.....

حسنا لقد نفعت تلك المسلسلات هذه المرة لكن هذا لا يعني أنلماذا أتعب حالي ... لقد أنهيت من تلك القصة....

عودة الإبن الضال

المهجرة ... العديد من الشباب يفكر بالمهجرة لبلاد أخرى، إما من أجل توفير حياة كريمة، أو من أجل المغامرة. في كل الأحوال سواء من أجل المال أو المغامرة، شرعية أو غير شرعية، دائما يكون هناك عواقب.. ربما حميدة وربما ليست كذلك.

خالي حاتم هو أصغر أخوالي. بعد أن تخرج من كلية الهندسة، كما كان يحلم جدي، قرر أن يهاجر ليحقق أحلامه الخاصة. قدم طلب هجرة لكندا، وأستطاع فعلا الحصول علي الموافقة.

تحطم قلب أبويه إثر سفره. وأصبح من المحرمات التكلم في هذه القصة نهائيا. طوال خمسة عشر عاما لم يزر خلالها مصر ولا مرة واحدة، داوم علي الاتصال بجدي مرة لا تتجاوز الخمس دقائق كل شهر. عرفنا من تلك المكالمات أنه تزوج وأنجب بنتين وولد وهذا كل شيء. ومع مرور الوقت، تعودنا عدم وجوده حتى أننا لم نكن نسأل عنه إلا حين اتصاله هل هو بخير؟ كيف صحته وعمله؟ ثم يقفل الحديث بالإجابة الحمد لله!

ذلك اليوم، عاد خالي حاتم دون سابق إنذار. دق الجرس.. وكان هناك!

ضربت اعتماد علي صدرها..

- مش معقول!

تقدم خالي بطريقته الخاصة ومد يده يدغدغ اعتماده..

- هو إيه دا اللي مش معقول ... طبعا أنك بقيت عجوزة
يا عجوزة..

صوت جدتي من الداخل:

- مين يا اعتماد

يضع خالي إصبعه علي فمه..

- ششش ولا نفس

تقدم بخطوات هادئة من باب غرفة المعيشة، ثم أمسك الباب
ومد رأسه..

- أنا جيت..

قامت جدتي من مكانها منتفضة - علي غير عادة (الروماتزم) -
مادة ذراعيها لتحضنه وهي ترتعش.. ارتمي خالي
في حضنها، وأخذت تبكي .

- كدا يا وحش أهون عليك كل دا ... كدا .. أنا قلت
هموت ومش هشوفك.

ابتعد عنها قليلا لينظر في عينيها الدامعتين..

- ايه يا زوز أنت عايزة تكبري نفسك ولا إيه .. دا أنسي
لسه في عز شبابك.

بالطبع عيناه لاحظت ما فعلت الخمسة عشر عاما في أمه.
أحنت ظهرها قليلا وتركت آثارها جانب العينين والفم ،
شعرها الذي تحول للأبيض..

التفت خالي خلفه..

- تعالو أنتم مكسوفين؟

لأول مرة تلاحظ جدتي وجود أحد غير خالي في الغرفة.
كان هناك زوجته وأبناءه. تقدمت الزوجة أولا..

- ماما أقدم لك ليندا حبيبة قلبي ومراتي.

فحستها جدتي من رأسها لأخص قدميها، ثم رسمت
ابتسامة متكلفة علي وجهها..

- أهلا ... أهلا

مسحت دموعها وهي تسال خالي:

- وللا أقول welcome

ردت ليندا قبله..

- سلامو أليكم ... أنا أفهم أربي كويس وأتكلم كمان..

أشرق وجه جدتي ..

- وعليك السلام يا حبيبي نورتي مصر ونورتينا ...

ثم نظرت خلف ليندا لتقول ..

- ودول بقي حبايب قلب جدتهم

تقدمت الفتاة الكبرى

- أنا فاطمة كدتي كيف هالك؟

احتضنتها جدتي، لكنها أفلتتها بسرعة لما شعرت بتصلب

جسد الفتاة في حضنها. تقدمت الفتاة الأخرى ..

- أنا آائشة hallo gran

نظر خالي لابنته شزرا فأصلحت من كلامها:

- أقصد كيف هالك كدتي؟

- الحمد لله في نعمة يا حبيبي.

في فتور كان سلام البنتين، وجاء دور الصبي الصغير .. كان

في السادسة من عمره، ويشبه خالي كثيرا. أقبل علي جدتي

وقبل وجنتيها ..

- أنا مهمد أرفه ألا اسم مين؟ اسم الرسول

ضحكت جدتي ..

- عارفة

- ارفة انه اسمي ولا ارفة اسم الرسول

ضمته جدتي..

- الاتنين

ثم نظرت لخالي في حنان..

- شكله كدا هيطلع لأبوه في لامته

نظرت زوجة خالي وأبناءه لبعضهم ثم لخالي في تساؤل عن
معني الكلمة وتكلم محمد

- لاماته دي زي اللمة اللي بتنور

قال خالي ضاحكا

- لاء يا محمد دي يعني لمض تقدر تقولمشاكس
وبينافر بالكلام

ابتعد محمد عن جدتي غاضبا ثم ارتمي في حضن أمه باكيا..

- جراي بتقول عليا لمضإهيء mam I'm
not knotty (أنا مش شقي)

تكلم صوت من خلفهم..

- محدش يقدر يقول لمحمد نوتي وجده موجود.

التفتت الجميع ناحية الباب ، كان جدي واقف متجهم
الوجه رافع إحدى حاجبيه ، تقدم خالي منه في خجل ووقف
أمامه ..

- إزيك يا حاج

- بعد ١٥ سنة جاي تقول إزيك وتمد إيدك

ثم ضحك جدي وفتح ذراعيه

- تعالي هنا يا ولد في حضني

ارتمي خالي في حضن جدي باكيا

- وحشتني قوي يا بابا

- أنت أكثر

- طيب ليه ما كنتش بترضي تكلمني كل المدة دي

رفع جدي وجه خالي لينظر إليه

- عشان أوحشك ... فترجع

كيشه

تختلف المصطلحات من بلدة لآخري .. فالشيء نفسه
يختلف اسمه من مكان لآخر. مثلاً السييا في مدن القناة هي
السيط في الإسكندرية وهكذا .. هذا ونحن في نفس
الدولة.... كيف يكون الحال بين دولة ودولة أو بين
قارة وقارة..

بعد عودة خالي حاتم من الخارج، استقر مؤقتاً في شقة
جدي، حتى يتم تجهيز شقته. كان هناك بالطبع صراع
حضارات، لكن ليست هذه قصتنا.

في يوم السبت من كل أسبوع يأتي (منوفي) ليمسح السلم
وينظفه. السبت الماضي لم يأت .. وأرسل من يخبرنا بأنه سيأتي
وقت أن يستطيع.

في ظهيرة يوم الاثنين، دق جرس الباب. ولانشغال اعتماد
في الإثبات لليندا أنها سيدة البيت الثانية بعد جدي، قامت
فاطمة بفتح الباب. كان منوفي الذي تفاجأ بها، فقد كان يتوقع
اعتماد

- سلامه عليكم

- أليكم سلام

حك الرجل جبينه

- هوا ... مش دا برضك بيت الحاج عبد الرحيم

- أها

كلم نفسه:

- وأها دي تطلع إيوة وللا لاء؟ إيه الحوسة دي!

ثم وجه الكلام لفاطمة:

- ألا الحاجة فين؟

- جرائي تصلي وجران مش موكود.

رفع يده ليهرش في شعره..

- يا سنة سوخه دي أها كانت أرحم لاء يا مس ...

أنا بقول الحاجة مش الجيران.. أنا مالي ومال الجيران! بقول
الحاجة الحاجة.

- أنا أكل جرائي بتصلي

ثم تنبّهت لكلمة جرائي..

- أقصد كدتي تصلي

- طيب اعتماد

- ثواني

- لاء لاء تعالي ماتعيطيش عليها قوليلها بس تجيب خيشة
وشوية ميه لحسن الحنفية مش شغاله

شعرت فاطمة بالارتباك.. لماذا تبكي علي اعتماد؟ ومن
يكون خيشة؟ لكنها استدارت لتفعل ما استطاعت
فهمه.. عادت حامله كوب ماء..

- تفضل

نظر منوفي للكوب في رية..

- إيه دي

- شوية مايه ...

- دي أعمل بيها ايه ... أنقط ولا أشربها وابخ؟

لم تفهم فاطمة بالطبع ما يقول كما لم يفهمها هو..

- بوك! ... إيه دي؟ أنت بتكول إيه؟

- بتكول! روعي يا شاطره اندهيلي حد كبير اتحدث

معاه.

دخلت فاطمة غاضبة علي جدتي..

- جرائي فين كيشة؟

- مين يا بنتي؟

- كيشه جرائي كيشه.

- تقصدي عايشة؟ في الاوضة جوه.

- لا جرائي.. كيشة موش ايشه.

- والله ما أنا فاهمة.

نادت جدتي علي ليندا لتفهمها ما تقول فاطمة..

what you want?

(عايزة إيه)

There is someone at the door asking
about khesha

(في حد عند الباب بيسأل علي خيشة)

what the meaning of khesha

(يعني ايه خيشة)

I don't know I think it's someone
name

(مش عارفة أعتقد دا أسم حد)

التفتت ليندا لجلديتي ..

- في هد هنا اسمه كيشه؟

- لاء يا بنتي هو كيشه دا اسم؟

وجهت ليندا الكلام لابنتها، وأخبرتها أنه لا يوجد خيشة في المنزل. عادت فاطمة لمنوفي علي الباب..

- سوري مافيش هد كيشه هنا.

وأغلقت الباب!

وقف منوفي ثواني في ذهول يكلم نفسه

- مافيش حد خيشة دا جنان دا ولا إيه
أكونشي دخلت عمارة غلط

خرج منوفي من باب العمارة ليتأكد أنه في المكان الصحيح

- آلاه آمال إيه اللي حوصل الوجت دا؟!!

عاد منوفي ودق الجرس مرة أخرى ، فتحت فاطمة أيضا..

- يا مس أنا مش بسأل علي خيشه أنا عايز خيشه ومايه..

فاطمة ضاق صدرها..

- أنت مش إفهم ليه ... كولت مافيش هد كيشه.

الانتقام

إذا فعل أحد ما بك فعله ضايقتك كثيرا، كما يقال " طلعت من نفوخك "، هل تسامحه بمجرد أن يعتذر؟ أم إذا أتتك الفرصة سترد له الصاع صاعين؟!

لم تستطع ميادة نسيان ما فعله خالي مراد يوم عرس أختها وكيف أنه استهزأ بها هو ووالداه، فأخذت تخطط له.

في يوم الأحد من ذلك الأسبوع، كان لدى خالي لقاء عمل مهم، حيث أن عميل ما جاء بصفقة حسب تعبير خالي " ستعبر بشركته لبر الشركات الكبرى "

أخذ يكلم زوجته عنها وعن مدى أهمية مظهره أمام ذلك العميل. وكانت الفرصة التي تحلم بها ميادة..

استيقظ خالي متأخرا، لأن المنبه لم يرن - صدفة - قفز من السرير وهو يصرخ ينادي زوجته..

- ميادة ميادة

لم يسمع رد ، دخل الحمام وخرج سريعا يبحث عن أمواس الحلاقة ، لم يجدها في مكانها ولا في أي مكان

- ميادة يا ست ميادة

خرج للصالة عندما لم يسمع رد ... لم يجد أحد لا هي ولا الأولاد، حدث نفسه بصوت عالي..

- راحت فين دي بس .. طيب أجهز أنا وبعدين أنزل للحلاق بسرعة

فتح الدولاب ليخرج بدلته ... صرخ

- إيه دا ... فين الهدوم

فتح الدولاب الآخر لم يجد سوى ملابس زوجته. أسرع للهاتف يطلب زوجته بعد رابع اتصال أجابت..

- ألو حبيبي..*

صاح غاضبا:

- أنت فين يا هانم؟

في هدوء مستفز ومرح ظاهر أجابت:

- هو أنا مش قلتلك امبارح قبل ما تنام يا حبيبي أني رايحه أنا و الولاد عند ماما؟ ... شكلك نسييت

- لاء محصلش.. لأني استحالة كنت أوافق تروحي النهاردة بالذات، وأنت عارفة عندي إيه.

لم تحب، فأكمل هو:

- وبعدين فين الهدوم؟

ضحكت ..

- الهدوم ... الهدوم..

- ميادة!

صاح محذرا.

- آه افكرت.. ودتها للتنظيف.

- نعم!

- مالك يا حبيبي بس؟ مش أنا دائما بوديها للتنظيف؟

استشاط غضبا..

- يعني ايه؟ ألبس أنا إيه الوقت؟

في شماته واضحة..

- عندك الجيتز وأي سويت شريت في دولاب التطبيق.

- إيه!

- مالك بس؟ ... علي فكرة أنت عصبي خالص وأنا

مبحبش كدا.

استطاعت ميادة في دقائق قليلة أن تجعل الدماء تغلي في
عروق خالي

- هو أنت لسه شفتي عصبية؟

قاومت ميادة الضحك، وافتعلت الغضب..

- لاء أنا مقدرش أكمل حوار بالشكل دا لما تهدي
أبقي كلمني سلام.

ألقي خالي تليفونه المحمول عرض الحائط فسقط علي الأرض
أربع قطع

- لاء لاء لاء

جمع خالي قطع التليفون بيده وهو مازال يردد

- لا لا لا

دار حول نفسه

- أعمل إيه أعمل إيه ... آه يا ميادة بس لما أشوفك دا أنا

هـ... هـ... ماشي الصبر حلو

خرج خالي من شقته ليطرق باب شقة خالتي سهام فهي
أسفل لشقته . صعقت ريم من مظهر خالي عندما فتحت الباب
فقد كان منكوش الشعر وعينييه يطل منهما الشرر ، مد يده
بقطع التليفون

- تعرفي في التليفون دا؟
- مالك يا خالو أنت كويس؟
- في نفاذ صبر..
- تعرفي تركبي التليفون دا؟
- أمسكت ريم التليفون بيدها تقلب فيه
- لا يا خالو التليفون دا خلاص كل سنة وأنت طيب.
- يعني إيه والأرقام اللي عليه؟
- إهدا بس يا خالو هي الأرقام علي الفون ولا الميموري؟
- مش عارف.
- جاءت خالتي سهام علي الصوت ..
- يا لهوي مالك يا مراد
- أشاح بيده..
- مش وقته
- أخرجت ريم شريحة الذاكرة من الحطام وأدخلتها في تليفونها
- آه يا خالو في أسامي كتيرة عايز أي أسم
- أشرق وجه خالي لأول مرة منذ أن استيقظ..

- محمود شاكر

شد خالي التليفون من يدها

- معاكي رصيدهعمل تليفون

أجري خالي مكالمته، ومن حسن حظّه أن العميل بادره
بالكلام معذرا

عن موعد الغداء لأسباب شخصية مطالبا إياه بتغير الموعد
للمساء.

عاد خالي لشقته ، سمع صوت قادم من غرفة النوم هل يعقل
أن يكون هناك سارق ، تقدم بحرص من الغرفة فإذا بأحد أبنائه
يركض خارجا. تفاجأ الاثنان

- معز أنت بتعمل إيه هنا؟

صاح معز مناديا علي أمه كأنه لم يسمع سؤال أبوه

- مامي .. مامي بابي جه

خرجت ميادة من غرفتها مبتسمة..

- أنت جيت يا حبيبي؟ ...

ثم أشارت بلوم علي ملابسها..

- أنت كنت فين كدا بالبيجامة؟ تو تو أنا زعلانة منك

تحول المرح الظاهر علي ملاحها وصوتها إلي قلق عندما رأت
تعبير وجه خالي لكنها أكملت..

- أنت مش بترد عليا ليه؟ أوعي تكون لسه مهدتش ...

اقترب خالي منها ببطء، ومع كل خطوة تقربه منها ترجع
هي خطوة للخلف

- إيه يا مراد مالك؟

لم يجب وأكتفي بأن يصر علي أسنانه ، لم يعد هناك مكان
للتراجع فلقد ألصق ظهر ميادة بالحائط ، أصبحت ميادة في
مواجهة خالي. أخذت في الارتعاش اللاإرادي رغم محاولتها
لتبدو هادئة..

صاح محمود من خلف أبيه:

- يا ماما تعالي شوفي البيه اللي مخلفاه عمل إيه في جذمتي.

كانت تلك اللحظة التي استطاعت ميادة الهروب فيها

- جايه يا حبيبي حاضر.

أمسكها خالي بسرعة من ذراعها ومنعها من الهرب

- كنتي فين؟

- الولد ... يا مراد اشوفه بس ورجعلك.

كأنه لم يسمعها..

- كنتي فين؟

- ما أنا قتللك ولا أنت فاكر أني نسيت الأسلوب اللي
اتكلمت بيه معايا؟ علي العموم أنا مسامحك بس عشان شكل
صباحك كان مش حلو.

صاح بغضب..

- أنتي لو عند مامتك تلحقي توصلي إزاي؟

- أنا ما قلتش مامتي أنا قلت ماما.. كنت أقصد مامتك.

ابتعدت عنه قليلا بعد أن حررت ذراعها..

- تقدر تسألها لو تحب.. بس من فضلك وطي صوتك..

أخواتك يقولوا إيه؟

استفزت خالي أكثر بكلامها..

- أوطي صوتي؟ دا أنا هكسر الدنيا..

تصنعت المفاجأة..

- ليه؟ إيه اللي حصل؟

- فين هدومي يا هانم

- ما أنا قتللك! أنت النهاردة بتسي كثير ... أنت
كويس؟

ضرب خالي الحائط بيده..

- يعني أقابل عميل مهم بالجيتز والتي شريت؟

صححت له بتلقائية ندمت عليها فورا..

- سويت شريت..

نظر لها خالي نظرة أرجعت الكلام إلى حلقها.. خرجت
الكلمات من بين أسنانه بطيئة..

- سويت شريت —————؟ زي العيل؟

- يعني أنت بتعترف أن المظاهر مهمه أهوه!

تكلم خالي من بين أسنانه..

- تفتكري دا وقته؟

- طبعا..

كان الانتصار والزهو واضح علي صوتها وعيها

- دا عز وقته.

نظر خالي في ساعته، فوجد أن مواعده يقترب، فكظم
غيطه..

- أنتِ بتعاقبيني؟ يعني مصلحة شغلي ما همكيش؟

- ابتسمت بحنان..

- هممني طبعاً يا حبيبي، وعشان كذا البدله بتاعتك البني
والقميص المقلّم الجديد في دولاب محمود ابنك مكويين
ونضاف تقدر تلبسهم.

ها ماذا أقول؟ مغامرات عائلي لا تنتهي أبدا.
لكنني أنا من انتهيت من تسجيل مغامراتهم لأنني بدأت
مغامراتي الخاصة ..


ليس هذا وقت الحديث عن مغامراتي فقد تزوجت
وكانت زوجتي ... ستعرفون أيضا..

في النهاية عائلي مجنونة أحيانا ... مشاكلها كثيرة نعم
.... لكنها أيضا محبة لطيفة.

وعلي رأي الشاعر الكبير بعور..

أكل العسل حلو بس النحل يقرص !!

حكايات زوجة نكدية جدا جدا



•

2. The first part of the paper is devoted to the study of the

3. The second part of the paper is devoted to the study of the


المقدمة

منذ قديم الزمان تناقلت الألسن حكايات ألف ليلة وليلة
ومنها عرفنا شهريار الملك الجبار الذي يقتل كل ليلة امرأة.
أيضا سمعنا عن ست الحسن والشاطر حسن ، عن كريم
وحليما وفاطيمة ومعهم ربما اللثيمة. تناقلنا العديد والعديد من
القصص عن حوريات، ساحرات ومشعوذين.. عن عنترة
وعبلة ، عن قيس وليلي حتى أمتزج الواقع بالخيال ولم نعد
نفرق بينهم. لكن كان هناك دائما شيء واحد متفق عليه، علي
مر أجيال وأجيال شيء واحد لا يستطيع أحد أن يخون عهده
ويفشيه كانت هناك عزيزة

حرصا علي أمن الرجال العام ومنع انتشار عدواها تم التكتم
علي أمرها. فعزيزة لم تدخل مجتمع ماء، كبر أو صغر، إلا
وأصبحت كل النساء عزيزة وكل الرجال ضحايا ذليلة. إلى أن
استطاع أحد الأشرار فتح الستار عن قصة عزيزة فجئت بها
لأقصها عليكم لكن في البداية أحب أن أنوه، أن أحذر..

يا رجال العالم احذروا عزيزة قادمة

يا نساء العالم تعقلن فعزيزة لم تكن يوما باللذيذة!



أسبوع النكد الأول

الليلة الأولى

في حي راقى من أحياء القاهرة المعز وقفت سيارة عروسين
أمام عمارة كبيرة. حمل العريس عروسه وخطا بها عتبة منزلها
لأول مرة. أنزلها برفق علي الأرض، وأمسك بوجهها بين
كفيه..

-أنا مش مصدق يا حياقي ... أخيرا بقينا لبعضنا

خفضت رأسها أرضا

-ههه.... متكسفنيش بقي ... بس الليلة كانت تجنن

-عندك حق أنا تخيلتها كثير بس بالجمال دالاء

رفعت وجهها في غضب وصاحت به

- تخيلتها ... مع مين إن شاء اللهآه مع سامية البت

المعصصة جارتك مش كدا ... أنا كنت عارفة إن في حاجة

بينكم

أقرب أكثر منها وأحاط خصرها بيده

- سامية مين الوقت .. يا حبيبي هو أنا ممكن أبص لغيرك

برضه

- حاسب إيدك ... هتضحك عليّ بكلمتين

ابتعدت عنه بضع خطوات في دلال

- يا حبيبي دي ليلة العمر.. تفكري ممكن أفكر في غيرك؟

سامية ونادية وعائدة مين بس !

ضربت صدرها بيدها، قبل أن تصرخ، وتضع يدها علي

رأسها

- يالهوي هو كمان في نادية وعائدة فينك يا ماما

تشوفي اللي بتتك فيه

اقترب منها مندهشا

- هي حصلت ماما ... يا حبيبي روقي أنا كنت بهزر

- إهيء ... إهيء

أمسك ذقنها بيده، ورفع وجهها ليرى عينيها ..

- طيب متزعليش أنا آسف

ثم طبع قبلة حانية علي جبينها

- خلاص بقي ساحبيني

- عايزني أسامحك؟

تملل وجهه

- أكيد يا عمري

- طيب قولي مين نادية وعائدة دول

خفض ذراعيه مللا

- ياه بقي كده كتير

رفعت رأسها في عزة نفس

- مدام كتير يبقى أخرج بقي وسييني لوحدي ... حرام

تستحمل كل ده

استسلم الزوج المسكين لطلبات الزوجة، وجلس علي المقعد في انتظار أن تطلبه أو أن تخرج له. طال انتظاره بلا جدوى..
وحينما قرر أن يدخل لها حاملا في يده وردة حمراء من الباقية التي أهديت لهم بمناسبة الزواج، خرجت له حامله شنطة صغيرة.

في دهشة ممتزجة بالرعب سألها:

-علي فين؟

تخطته متجهة للباب وهي تتكلم:

-إيه؟ أنت فاكر ماليش أهل؟

وقف بينها وبين الباب

- يا حبيبي عيب.. الناس تقول إيه بس!

حاولت أن تزيجها جانباً، وعندما فشلت، وضعت يديها في
خصرها رافعة حاجبها حتى كاد أن يلمس طرف طرحتها ..
-الناس! أنا ماليش دعوة بالناس! هتوصلني ولا أروح
لوحدتي؟

-هتقوليلهم إيه بس؟ وبعدين مافيش سبب .

أمسك كتفيها بيديه لتهديتها ..

- يا حبيبي إهدي شوية نتكلم ... نتفاهم

أبعدت يديه في حنق، وقلدت طريقته في الكلام معرضة في
طبقة صوتها ..

-مافيش سبب نتكلم ..نتفاهم ... لما أعرف ليلة
جوازي أن جوزي يعرف عليّ سامية ونادية وعائدة، أمال بعد
سنة هتعمل إيه؟

ابتسم في حنان، وأحاط كتفيها في دفء ..

-يا حبيبي دا كان كلام.. أخذت أسم سامية وجبت اللي
شبهه.. يعني برضه في حد يحب واحدة أسمها عائدة؟ دي تبقي
قد أمه

نظرت في عينيه لترى مدى صدقه ..

- بتكلم جد؟

لمس خدها بطرف أصبعه في حنان

- هو أنا عمري كنت جد زي النهاردة؟ دا حتى في

موضوع جد جدا كنت عايزك فيه بس مش هنا

ضحكت في دلال..

- آمال فين؟

- هقولك

وبعد محاورات ومفاوضات استغرقت أربع خمس ساعات،

وافقت العروس علي بالبقاء بشرط عدم ذكر أي أنثي في هذا

المتزل سواها

الليلة الثانية

أغلق مدحت الباب خلف حماته وأسند ظهره علي الباب ثم
أطلق زفرة طويلة قبل أن يتكلم

- أخيرا يا حبيبي لوحدنا

اقرب، منها فابتعدت عنه رافعه حاجبها الأيمن - تقصد
إيه؟ هي ماما كانت قاعدة علي قلبك ولا إيه؟

ابتسم ابتسامة صفراء حاول أن يدارى بها ما يعتمل بقلبه

- لاء يا حياي طبعاً بس في حد يزور حد برضه يوم
الصباحية؟

قلبت عزيزة " العروس " وجهها ..

- هي في أم مابتزورش بنتها يوم الصباحية؟ وبعدين هي
كانت قعدة تتضايف؟ دي كانت جاية معاها المحمر والمشمز

- آه جابته وجابت اللي يكلوه

قالها وضحك، لكن ضحكته قتلت علي شفتيه بفعل السهام
التي أطلقت من عينيها

-ليه؟ هما أخواتي كلو حاجة من جييك؟ كله من

عز بابا

ارتسم الضيق علي محياه

- أنا قلت حاجة برضه....

ثم اعتدل في وقفته مستخدما حجج الإقناع التي لديه..

- بس يعني جابو الأكل الساعة ٢ والساعة الوقت ١٠ يا

دوب نازلين.. دا ينفع؟ مش برضه يابخت من زار وخفف

خصوصا في شهر العسل يا عسل؟

ضرب علي ساعة يده بإصبعه، قبل أن يحاول إحاطة

زوجته بذراعيه، فأجهضت عزيزة المحاولة بابتعادها عنه

مستخدمة ذراعيها ويديها في تمثيل ما تقوله

-إيه دا إيه دا! أنت من أولها هتقولي بيعجوا وخفف! لاء دا

بيت بنتهم ينوروا أي وق .

هز رأسه موافقا ..

- ماشي.. دي جوا عنيا عشان خاطرك يا قمره أنت....

بس مش من أول يوم كدا

-بقولك إيه قفل أحس .

أشارات بيدها مؤكدة ما تقوله

- علي رأيك مش عايزين الليلة دي كمان تبوظ

وضعت يدها علي صدرها في حسرة

- تقصد أن أنا اللي بوظت ليلة أمبارح؟

ثم أشارت بإصبعها في وجهه حتى كادت تحترق عينيه لولا
أن تفادها.

- اللي بوظها عينك الزايعة

- بقولك إيه صلي علي النبي كدا.. فات يومين من

الأجازة بتاعتي، كلها خمسة ايام خليفهم بقي يقو غسل ..

-ولو مختلهمش هتعمل إيه يعني؟

أعطاهما ظهره وأشاح بيده

-ولا حاجة تصبني علي خير .

-إيه دا أنت هتسبني وتنام؟

وقف في مكانه دون أن يلتفت لها

- آه عندك مانع

-إهيء إهيء يا عيني عليا وعلي بختي

استطاعت أن تجعله ينظر لها ..

- مالوا بختك إن شاء الله؟

-مالو ... مالوش ... إهيء إهيء

لم يحتمل أن يراها تبكي، فابتسم برفق وربت علي كتفها

-طيب خلاص ما ترعليش ويالا نحضر العشا مع بعض.

مسحت دموعها وقالت في دلال :

-العشا ... ومين ليه نفس ..

-طيب يالا نفتح فيلم كوميدي يروقلنا الجو..

هزت كتفها معترضة

-أنا عايزة أشوف تو

رفع حاجبيه وضيق عينيه في مزاح، وهو يعبث بخصلات

شعرها المناسبة

- ليه في إيه النهاردة؟

أشرق وجهها وهي تتكلم..

- في فيلم رعب أول عرض .

صدم مدحت وأنزل ذراعيه جانبه

- رعب! ... بقولك كوميدي تقولي رعب!

غضبت من اعتراضه علي الفيلم..

-مادام أنت مقرر هتفرج علي إيه كنت بتشاوري لي؟

- يا حياتي فيلم رعب إيه دا هنا لسه خالصين من واحد ..

ضحك معتقدا أنها فهمت المفارقة التي يقصدها.. لكنها لم تفهم، بل وردت الصاع صاعين

-برضه بتتكلم علي ماما كدا ... يعني كانت تليفونات مامتك اللي من صبحية ربنا دي اللي مش ثقالة ولا إيه؟ بس الواحد مش بيحب يتكلم .

كشر وجهه وهو يعيد ما تقوله

-ثقالة .. أمي ثقيلة... عزيزة..

- نعم...-

ولاها ظهره وهو يقول:

-تصبحي علي خير

تركها ودخل غرفة النوم وهي مذهولة من رد فعله المبالغ فيه - حسب اعتقادها -لكلمة صغيرة

الليلة الثالثة

دخل مدحت من باب المنزل ليجد عزيزة منتظرة علي المقعد
أمام الباب. وأول ما رأته بادرته :

- كنت فين لحد الوقت

لم يجيها فصاحت :

-أنا مش بكلمك

رد في ضيق:

- في القهوة

قامت من مكانها، بكت وهي تضرب علي صدرها

-يالهوي يالهوي ... الناس تقول عليك ايه؟ في عريس يروح

القهوة تالت يوم جوازه؟ تعالي ياماما شوفي اللي بتك فيه.

استخدمت أسلوب التهديد حتى يرجع لكنه وأد محاولتها

وردها في اتجاه المعاكس

- ياريت

في ذهول تساءلت

-نعم!

- ياريت ماما تيجي تشوف معاكي حل ..جوزك راجع
وجايب معاه

ثم أشرق وجهه بابتسامة عذبة وهو يرفع يديه ليظهر ما
بها..

- تذاكر السفر.. هنروح الغردقة اربعة ايام فول بورد في
فندق اربع نجومها ها
لوت جانب فمها وهي تقول:

-اربع نجوم ومايقاش خمسه ليه مش قد المقام؟ ...
وبعدين دا مش عذر عشان تتأخر

لوح الزوج بيده المسكة بالتذاكر

-الغردقة... اربع تيام لوحدنا انا وانت
والبحر..... السفر الفجر ... مين هيحضر الشنط ؟ اللي مش
هيحضر مش هيسافر..

وضعت يدها في خصرها

-انت بتدلني.. طيب مش مسافرة

جلست الزوجة علي الارايكة رافعة أحد حاجبيها لأعلي
وتدبذب بقدمها علي الأرض... اقترب منها مدحت و جلس
القرفصاء أمامها

- حبييتي ... قلقتك عليّ آسف

ابتسمت في دلال وهي تقول:

- طيب مش كنت تقول كدا من الأول بتحبي؟

-طبعا يا حياتي

-لاء قولها لي

-بحبك

- يعني الواحد لازم يشحتها ... يالا قوم نحضر الشنط

أبعدته عنها حتى تقوم، لكنه سحب يدها لأسفل حتى

يقيها جالسة

-لازم عربون

-إيه دا... بص يامدحت أنا عفاريت الدنيا بتنطط قدامي

مش ناقصة غلاسة

عاتبها برفق مبتسما وكأنها طفلة صغيرة

-غلاسة حبيبي بقها بيحدف طوب

-انا بوئي بيحدف طوب! ... طوب يامدحت! طيب

شوف مين هيروح معاك بكرة لاء شوف مين هيوديك

بكرة قال تروح لوحدك قال.. هي ساوية!

رفعت رجليها علي المقعد لتقرفصهم تحتها في عند..

حاورها بلطف عسي أن يعدل مزاجها

-أنا مقلتش ح...-

قاطعته في حدة

-لاء كنت قولها وبعدين كنت هتروح مع

مين؟.....آه البت سامية أكيد

- احنا مش قفلنا اموضوع دا ولا إيه

رفعت أصبعها منذرة إياه..

-اتقفل آه.. اتنسي لاء

جر ناعم مجددا معها..

- طيب ياستي ... أنا من غيرك مقدرش أروح في حته

مش أنتِ الحته بتاعتي ولا إيه

وكز رأسها برفق وهو يتكلم فأجابته بصوت خفيض

ودلال..

-إيه... قول كمان

- يا حياي أنا من غيرك وحيد

بسرعة تغيرت طبقة صوتها

- إحنا هنكذب من أولها ... أنت مدحت مين وحيد دا

-أنا من غيرك مدحت بس هبقي وحيد كدا حلو

ابتسمت بجانب فمها

- حلو

- طيب بلّي ريقى بكلمة

أخرجت لسانها وهي تقوم وتقول

- ميه

- إيه؟

ابتعدت عنه مسرعة تضحك حتى يأتي ويلحق بها..

- مش عايز تبل ريقك؟ أشرب ميه

صدم من ردها وأراد صدمها هي الأخرى

- حياتي بجد بجد تصبحي علي خير

الليلة الرابعة

• دفع مدحت عزيزة لتدخل غرفتهم في الفندق وبعد أن أغلق الباب صاح بها

- اتفضلي ياهام

- انت كمان بتزعل

أمسك ذراعها من جديد

- ازعل بس.. دا انا هكسر الدنيا

نزعت ذراعها منه، ووقفت وقفة دفاع واضعه يديها علي
خصرها

- نعم نعم

تخلي مدحت عن صوته العالي وجلس علي المقعد واضعا
رأسه بين كفيه وهو يقول

- فضحتينا ربنا يسامحك ليه كدا ليه؟

- انا برضه اللي فضحتك ولا عمايلك وعنيك الزايغة ...

كنت اسببها تخطفك مني وانا قاعدة زي كيس الجوافة؟

رفع رأسه لينظر لها في ذهول

- تخطف مين دي عيلة

- عيلة سلامات ياعيلة دي تجيلها ولا ١٨ ، ١٩

سنه

مازال الدهول علي وجهه، واختلط به حنق شديد

- يا ظالمة دي يا دوب متجيش ١٤ .. اتقي الله

صاحت به وهو تشير لأعلي بيدها

- ١٤ عفريت .. كل النخلة دي ١٤ سنة ليه؟

- نخلة! البنت اقصر منك بشرين تلاته يا شيخة

عندما ضعفت حجتها، في ثوان استخدمت إستراتيجية

الاستعطاف، خفضت من صوتها ومزجته بقليل من الشجن

- طبعاً ما أنت لازم تقول كذا عشان اطلع أنا اللي وحشة

كتم غيظه أكثر، وجز على أسنانه وهو يقول :

- انتِ دا انتِ استغفر الله.. خلاص

روحي نامي

مازلت تتبع إستراتيجية الاستعطاف

- اروح انام ليه هو انا فرخة

اصطنعت البكاء وأكملت:

- وللا انت كنت جاييني هنا عشان تيمني من العشا
- انت فاكرة اني عندي وش أقابل بيه اللي في الفندق بعد
الفضيحة بتاعتك؟! دا أنت ضربت السياحة في مصر
في دهشة :

-أنا!

-أيوه يا بريئة أنت مين من سكان استراليا بعد ما
يسمع اللي أنت عملتيه في بنتهم ممكن يجي؟
حركت يديها كأنها تهش شيء ما وهي تتحرك في اتجاه
الحمام.. تكلمت بإستهانه شديدة:

-هو أنا عملت ايه.. دا دفاع شرعي عن النفس
أوقفها مكانها بشدة ..

-هي البنت مستك حتي بكلمة

نسيت إستراتيجيتها ،رفعت حاجبها، وقالت ببطء كأنها
تذره مما سيأتي إذا أكمل هذا الحوار:

-لما تاخد... جوزي من ايده... وتقوم ترقصه ...يبقي ايه

-يا ظالمة دي كانت بتسأل علي الساعة.. وبعدين حتى لو
حصل أنت شفتيني تحركت من مكاني؟

ضحكت بسخرية إزاء ما قال

- هاها.. هو انا لسه هستنى

ثم خبطت برفق علي رأسه قبل أن تقول :

- انسى.. ونصيحة لو مش هنخرج يقي ما تتكلمش في

الموضوع دا تاني ، أقولك نام أحسن

كانت الصدمة مسيطرة عليه.. وهي تأخذ المنشفة، وتدخل

الحمام قبل أن تغلق الباب خلفها ذكرته:

- تصبح علي خير

الليلة الخامسة

قفزت عزيزة علي السرير و ربت بعنف علي كتف
مدحت

-مدحت

تألم مدحت وهو مازال نائم

-|||||||اه

كررت مافعلت

-مدحت

أمسك كتفه يملكه، وهو يحاول جاهدا أن يفتح عينيه

-ايه ... عايزة إيه ياحبيبي

تغاضت عن نسيانه اسمها، فقد كانت تشعر بممل شديد، ولا
تريد أن تدخل معه في جدال فيظل نائما، نكاية فيها فقط

- أنت هتفضل نائم كثير؟

- آه

- أنت بتهزر؟.. قوم يلا عشان نخرج

تثاءب وهو يسألها:

- نخرج ... هيا الساعة بقت كام؟

- تيجي ستة ونص كدا

أعاد رأسه علي الوسادة مرة أخرى

- يعني أنا بقالي نص ساعة بس نائم

رفعت رأسه بيدها

- وحنّا كنا جاين عشان ننام! ... يالا قوم

- يا حبيبي أنتِ شفتِ اللي حصل لي النهاردة على

المركب.. أنا لسه مش حاسس بدماعي

وضعت يديها في خصرها معترضة

- وأنا ايه ذنبي أن عندك دوار بحر... هو أنا كنت جاية

عشان أفضل في الأوضة؟

ربت علي رجلها بحنان:

- معلش يا حبيبي الليلة بس.. انا مش قادر اتحرك

أبعدت يده، وأجابته في غضب:

- طيب نام

بعد نصف ساعة، لم تعد تتحمل، فجلست بجانبه علي

السريّر تداعب شعره في حنان مصطنع..

- مدحت

- ها ... نعم

خاطبته بغنج ودلال وهي ترسم دوائر علي معدته

- أنت لسه ... عايز ... تنام

- أنا نائم

ضحكت برفق محاولة التأثير عليه

- آمال بتكلم أزاي ... يالا بقي خيلنا نزل

وضع الوسادة علي رأسه دون أن يجيب

- إيه دا متحطش المخدة علي دماغك

- طيب سيبي شوية كمان

قامت من علي السرير غاضبة

- حاضر ... حاضر

بعد نص ساعة أخرى، كان الغضب قد أخذ منها مأخذه،

فصاحت بمدحت، جعلته يقفز من مكانه

- مدحت كفاية بقي نوم

- حاضر حاضر البسي أنت علي ما أفوق

بتحد وغضب قالت :

-وأنت؟

-أنا بلبس في ثواني خلصي أنت بس

بعد ساعة ونصف، كانت في أتم صورة. لم ينقصها سوى
لبس الطرحة، جاءت جانبها وصاحت بصوت عالي فقفز مرة
أخرى

-أنت لسه نايم؟

فرك عينيه بيده ،نظر لها بعين نصف مفتوحة ..

-أنت خلصت؟

دقت بقدمها اليمنى على الأرض

-آه.. لسه بس الطرحة يالا قوم

أغلق عينيه مرة أخرى

-طيب أنا قايم أهوه البسيها بس أنت

صاحت مرة أخرى :

[illegible]

—فیه ایہ؟

- ما انت عارف يا حبيبي النهاردة كان باديء من الساعة
٨ الصبح .. يعني اكيد عايزة أناام

صاح غاضباً:

- ما أنا كنت نايم

بهدوء مستفز:

- خلاص بقي نام تاني

- أناام! أنتِ أنتِ.....

دخلت السرير، وأغلقت النور قبل أن تقول:

- بقولك ما تبقاش نكدي أنا ابتديت أصدع ... تصبح

على خير

وضحكت قبل أن تكمل:

- يا عمري

الليلة السادسة

-إهيء إهيء

قام مدحت علي صوت بكاء عزيزة

-مالك يا حبيبي؟

أعطته ظهرها وهي ما زلت تبكي

-مالي؟.. انت حاسس بحاجة

جلس في مكانه، ومد ذراعه ليلفها في اتجاهه

-معلش أنا وحش مالك؟

هزت رأسها موافقة

-آه.. وحش قوي كمان

في صبر نافد..

-ياستي خلاص.. مالك ليه بتعيطي؟

أمسكت الوسادة وضعتها علي بطنها وطويت نفسها عليها

-بطني هتفرتك مش قادرة

حاول مدحت ألا يضحك وفشل، فصدرت عنه ضحكة

صغيرة أمسكها بسرعة

-هههه إحم...معلش أصلي افكرت حاجة...

ضم فمه ليمنع نفسه من الضحك

-معلش يمكن تقلتي شوية علي العشا

في براءة مصطنعة وإنكار حقيقي

-أنا؟ أبدا!

ضيق عينيه قليلا في عدم تصديق

-متأكدة يا عمري؟ ... يعني اصل الجمري والكلويز مش

ماشين مع أم علي والمهلبية اللي حليتي بيهم

ضربت علي صدرها مصدومة من كلامه

-أنت بتعد عليا الأكل كمان؟

وبدأت في نحيب وشكوى لحظها

- تعالي ياماما شوفي جوز بنتك وهو بيعد عليها الأكل...

ثم صوبت أصبعها في عينه، وهزت رأسها يمينا ويسارا

-مكنتش أعرف أنك بخيل يا بخيل

كانت صدمة مدحت حقيقة.. فهو أبعد ما يكون عن

البخل فهل هناك من بخيل يدفع " منيم تشارج " ١٥٠ جنيه

للفرد

-أنا بخيل! ... طيب ربنا يسامحك.. الوقت تعالى نروح
للدكتور

رفضت بعند زائف عرضه

-لاء بلاش .. أحسن تصرف عشرين جنيه ولا حاجة

كانت الدهشة والتعجب رفيقاه في هذه الليلة

-عشرين جنيه!

لم يتحرك.. غلبه العناد بعد ما قالت، فأرادت أن تؤثر عليه
أكثر...

-||||| اه يا ماما أنتِ فين ؟

هز رأسه كأنه ينفذ عنه ما قالت من كلمات ثم حثها علي
القيام

-يا حبيبي قومي بلاش دلع.. تعالى نشوف دكتور
الفندق.. ولو الموضوع محتاج مستشفى اوديكي
هزت رأسها في سخرية..

-اه قول كدا دكتور الفندق...

ثم قالت بصوت خفيض كأنها تحدث نفسها متيقنة أنه
يسمعا

-أنا قلت برضك إيه الكرم اللي نزل عليه دا...-

ثم علت بصوتها

- مش كنت تقول من الأول

-ربنا يسامحك.. يالا قومي.. بس خلال عشر دقائق لو

مكنتيش جاهزة عيطي بقي للصبح

أرادت غيظه بعد أن أحبطها عد إشفاقه..

-أنت كمان بتهددني طيب أنا مش رايحه في حتته

وخلييني اموت هنا بس يكون في علمك أنا هكتب ورقة أقول

فيها أنك سميتني

صدم مما قالت

-نعم!

-نعم الله عليك

زحزح نفسه علي السرير ووضع الوسادة علي رأسه قائلاً:

-طيب خليك بقي شوفي مين هيعبرك ... تصبحي علي..

ولا متصبحيش.. أنا هنا

قامت من مكانها تركض في اتجاه النافذة تريد أن تفتحها

وهي تصرخ..

-يالهوي يالهوى الحقوني ياناس.. جوزي سمني ويدعي
عليا أموت

لم يتحرك من مكانه لعلمه أنها مناورة فارغه لا أكثر..
غيرت عزيزة وجهتها من النافذة للباب..

-أنت رايحه فين؟

دون أن تنظر له

-رايحه أشوف المصيبة اللي أنت عملتها فيا ...

ضحك وقد أمتعته أن يغيظها ..

-طيب معاكي ربنا

ركضت خارج الغرفة وهي تقول:

-بس أنت بقى لما تيجي النيابة تحقق معاك أكيد ربنا مش

هيكون معاك ياظالم

قام الزوج المسكين من السرير، ليلحق بزوجته، في محاولة
أخيرة لفض الخناق

-طيب ممكن تلبسي عليك الروب وأنا هطلب الدكتور

قالت بانتصار :

-كنت قول كدا من الأول ... ناس تخاف

دفع مدحت الباب بضيق ملقيا المفتاح علي السرير في
غضب

- اتفضلي

ألقت عزيزة نفسها علي السرير بجانب المفتاح وهي تبكي

- إهيء إهيء ياعيني عليا وعلي بختي

وقف مدحت أمامها رافعا حاجبه الأيسر متعجبا

- ماله بختك

كأنها لم تسمعه أكملت نحيبها

- أنا عايزة ماما.. هاتلي ماما

لان مدحت قليلا بصوته..

- يا حبيبتي إحنا كلها بكرة وماشين.. وبعدين ما الدكتور

قال إنك علي الصبح هتكوني زي الفل

رفعت رأسها معترضة بشدة أنستها أنها تبكي من الأساس

- زي الفل! أنا مش عارفه ايه اللي بيحصلي دا ...

قامت من مكانها، ونظرت لنفسها نظرة مطولة في المرآة،

قبل أن تكمل:

- أكيد أتحدثت ماأنا كنت زي القمر يوم الفرح ..
وشوف وشي النهاردة عامل إزاي

وقف مدحت خلفها يتأملها بدوره

- ماله الحسد بالتلبك المعوي ... الدكتور قال شويه لخطبة
في الأكل عملت تلبك بس ياستي يعني لا حسد ولا حاجة دي
طفاسة

التفتت تواجهه

- إيه؟

- بقول دي غلاسة معدتك بتغلس عليك
شوية

عادت تنظر لنفسها في المرأة وهي تعبت بوجهها.. ترفع
ذقنها.. وتلف وجهها يمينا ويسارا

- لاء.. بقولك حسد.. أنا عمري ما حصل لي كدا
أبدا... شايف عنيه وللا لو بي الأصفر ... هو الحسد مافيش
غيره

ثم التفتت مرة أخرى لتواجهه

- تعرف.. أنا عارفة مين

لم يرد عليها واكتفى بهزة صغيرة من رأسه

- وفكت من شهر ، فقلبيها قام غلي ومقدرتش تمنع نفسها

من حسدنا

- يا ستي حرام.. ما أنتِ عارفة أنه كان مطلع عينها

والحمد لله خلصت منه، وحتى جالها كام عريس بعده يعني لا

محرومة ولا متغاظة

- مالك مالك؟ إيه الحنية دي كلها؟!.. لتكون كنت

نحبها دي كمان؟

- طبعا

قامت واقفة مرة واحدة واضعة يديها علي خصرها كأنها

مارد

- إيه

رفع كفيه أمام وجهه ليسكتها، ثم ضم كفه وهزه قليلا

لأسفل وأعلي

- زي أختي الصغيرة... زي أختي

- لاء يا حبيبي.. أنت مالکش غير أخت واحدة صغيرة..

ماشي؟

قام من مجلسه وأخذ يخلع في ملابسه

- حاضر.. ممكن تغيري هدومك وتنامي؟.. الفجر خلاص
هياذن وأنا عايز أناام

ألانت صوتها قليلا وهي تربت علي كتفه من الخلف

- تنام ومراتك نور عينك تعبانه؟

دون أن ينظر لها

- تعبانه بس مالك تاني؟

دفعته بلطف وقالت بدلال

- ليه هو غسيل المعدة دا سهل

ثم غيرت من نبرة صوتها وأخذت تشير بيدها

-أنا كل ما افكر لما قع.....

أمسك يدها بسرعة ليمنعها من التكملة

- أبوس إيدك بلاش توصفي تاني.. أحسن أنا اللي هيرجع

الوقت

جلست علي حافة السرير ممتعة

- أنت مش طايقلي كلمة ليه النهاردة

- عشان عايز أناام

ألقت عليه الوسادة

- عايز أناام ... عايز أناام ... خلاص نام

-آي ... طب ليه بترمي المخدة!

في حدة قالت

- كانت مضيقاني.. عندك مانع؟

عدل من وضع بيجامته ودخل السرير

- لاء

بعد مرور القليل من الوقت كان مدحت يخوض في نوم عميق، أما عزيزة فكانت تستند علي الوسادة غارقة في أحلام اليقظة وهي تتذكر يوم عرسها

- مدحت

- |||||

- مدحا|||

رفع رأسه عن الوسادة

- نعم نعم

— زي الناس

ضربت الوسادة برقة

- لاء بچد

فتح عینیه و صرخ بها

- یاستی حرام علیکی عایز أنام ارحمینی عایز

م

رفعت يديها في استسلام مزيف

- خلاص خلاص تصبح علی خیر

عدل من وضع الوسادة

— وأنت من أهله

مالت عليه، وداعبت شعيرات صدره القليلة بيدها

- یعنی کنت اکثر حد قمر أنت شفته صح؟

دفعها بعيدا عنه ، قام من السرير وارتدي الروب فوق

البيجامة ثم سحب وسادة

- تعرفني.. أنا نازل أنام في اللوبي تحتسلام

الليلة الأخيرة

دخلت عزيزة الشقة وخلفها مدحت حاملا الشنط. دفع
الباب بقدمه ليغلقه ثم أنزل الشنط وهو بالكاد يلتقط أنفاسه.
ألقت عزيزة نفسها علي المقعد متبرمة

- أنا عارفه ايه اللي رجعنا النهاردة بس

من خلال أنفاسه المتقطعة أجاب

- مش انت.... انتي اللي طلبتي ترجعي عش.... ان

تعبانه؟

- وانت قلت بركه يا جامع

جلس علي المقعد المقابل لها

- ازاي بس؟ انتي اللي عيطتي وطلبتي مامتك في التليفون

تشكيلها انك عايزة ترجعي وانا مانعك وك.....

قامت لتقف أمامه ملوحة بيدها

- أيوه أيوه طلع كله.. دا انت طلعت معي ميني قوي

وقف بدوره ممسكا ذقنها

- لا ابدا ياعمري انا بس حبيت أوضع لك النقط بس

ثم تركها وعاد ليجلس

- وبعدين يعني أنا حابب ان فلوس الليلة دي تروح علينا؟ أكيد لاء

تكلمت في استنكار :

-- فلوس .. فلوس .. فلوس انت مابتفكرش غير في الفلوس؟ ايه؟

كانت الدهشة علي وجهه تصرخ وتقول أنا هنا

- أنا!!!

أرد أن ينهي الحوار قبل أن تتفاقم الأمور كالعادة

- حياقي انت مش تعبان من السفر؟ يالا عشان ترتاحي في اوضتك

أمسكت ظهرها متصنعة التعب

- اه صح تعبان من المكروباس التعبان اللي رجعتنا فيه

- مكروباس ايه دا اتوبيس خمس نجوم

قالت بسخرية:

- خمس نجوم مرة واحدة!.. وكانوا فين النجوم دي؟

قام من مكانه متجها لغرفة النوم وهو يتكلم

- ما كانوش.. المهم اننا لاقينا مكان نرجع اصلا.. دا لولا
أسماء بنت خالتى كنا زمنا رجعنا بسبعة راكب

أسرعت لتمسك بكم قميصه تمنعه من دخول الغرفة
-استنى استنى لولا مين؟.... أسماء بنت خالتك! ماها ست
اسماء كمان؟

كانت معالم الغضب بادية علي وجهها مما جعل مدحت
يحاول غلق الموضوع بدل من الدخول في مناقشة حامية أخرى
ولكن كان السيف قد سبق العزل

-مافيش

بإصرار :

-لاء فيه

تكلم مدحت بصوت رقيق خافض ليؤثر عليها
-أصل أنا حاولت الاقي مواصله تزلنا مالقتش قمت
كلمتها عشان تدبر لنا حاجة. أنت عارفة أنها بتشتغل في
شركة سياحة يعني ليها ناس في كل بلد سياحي.. بس
طبع قبلة علي خدها ليكمل السحر، مسحت عزيزة القبلة
بيدها وصاحت:

- قمت قلت وماله؟ مادام كيس الجوافة اللي في الفندق
 نائمة علي ودانها ولا داريه بحاجة اعمل اللي انا عاوزه
 بدى الاستنكار علي وجه مدحت من ذلك الأسلوب
 - كيس جوافة ايه ما انا قلتلك اهو
 استخدمت عزيزة يديها لتأكد ما تقول
 - بعد ايه؟ بعد ما قعدت انت وهي تتمسحوا عليا؟
 بدأ صبر مدحت في النفاد، فتكلم بنغمة محذرة:
 - ايه اللي انتي بتقوليه دا؟
 عزيزة لم تفهم، بل تبادت أكثر وأكثر
 - قصدك ايه اللي عملته دا
 حذرها مدحت
 - عزيزة ماتزوديهاش
 لم يكن هناك حدود لصفاقة عزيزة، فظلت تصرخ بأعلي
 صوتها، وتشير بيدها
 - لاء.. دا انا هزودها وازودها ووريني انت هتعمل
 ايه يايبه
 تملك الغضب من مدحت

-عزيزة

لم تأخذ في اعتبارها شرارات الغضب التي تتطاير من عين
مدحت

-عزيزة عزيزة كنت عارفه انك كل اللي بتقدر عليه الكلام
رسم ابتسامة صفراء علي وجهه

-حياتي قربي كدا

تخليت عزيزة أنه قد خضع لصوتها العالي فتكلمت بثقة
زائدة

-ما تقرب انت...حكم.... اللي عايز حاجة ما يعملها هو

اقترب مدحت منها، وأمسك وجهها بيده

-عندك حق...بصي لي كدا...عايز ابص في عينك

ثم رفع يده لأعلي وأنزلها بأقصى قوته لتهوي علي وجهها ،
بدت الدهشة علي وجه عزيزة وغطت خدها بيدها في ذهول

-أنت.. أنت عملت ايه؟

بدأت تدرك ما حدث

- أنت اتجننت؟ بتضربي بالقلم يابن الـ.....؟

قاطعها بسرعة ألجمت لسانها

الفصل الثاني

يا طلبة ما تمت

(١)

- يا سلام ياماما ... لاء طبعا هو اللي لازم ييجي الأول
جلست أم عزيزة بجانبها وأخذتها في حضنها تدللها
- ما هو هيجي يا عبيطة ويزحف كمان لكن الخطوة الأولى
لازم منا

هزت عزيزة كفها في عند طفولي

-ليه يعني؟

خبطت أم عزيزة علي رأسها بإصبعها
- عشان يا ذكية هيعرف مين انك حامل
تنهت عزيزة..

-آه

اعتدلت أم عزيزة في جلستها مؤكدة كلامها بإشارة من
يديها

- هتشوفي أول ما تكلميه هيجي لحد عندك زاحف

قامت عزيزة من مكانها ووقفت أمام النافذة وهي تتكلم
- بس أنا مش طايفة أكلمه.. دا ضربني وطلقني في شهر
العسل.. أنا فضحيتي كانت علي كل لسان
تبعثها أمها مهونة عليها الأمر
- بكرة تخدي حقك تالت وملتت.. اسمعي كلام امك بس

-آلو
أجابت عزيزة بحدة وبسرعة
-من غير آلو.. أنا عندي كلمتين بس
بنفاد صبر تكلم مدحت بعد أن زفر زفرة قوية
-خير
بتأني أجابت..
-أنا حامل سلام

دق جرس الباب ، تلكأت أم عزيزة قليلا قبل أن تفتح
الباب تاركة من خلفه ينظر، ثم فتحت وهي رافعة حاجبها
متجهمة.

- سلامه عليكم إحم إحم ... ازيك ياحماتي

مصممت بشفتيها قبل أن تتكلم
 -حماتك!.. ماكنش يتعز... اتفضل
 تقدمته لغرفة الصالون وما أن جلس حتى بادرها بالكلام
 -عزيزة قالت لي.....
 تصنعت الدهشة، وضربت علي صدرها
 -هي كلمتك؟ طيب أنا هوريها...
 تنهدت بعمق قبل أن تكمل
 - بس هعمل إيه في قلبها الطيب وحنيتها ، أنا عارفه طالعة
 خاية لمين
 لم تدخل تلك المسرحية علي مدحت فتكلم باقتضاب..
 -ممكن أشوفها؟
 ضحكت بسخرية..
 - تشوفها بمناسبة إيه؟ ما خلاص فرکش .. أنتم مش
 أتطلقتم؟
 - بس ياطنط ما هي لو حامل أنا مايرضنيش أبدا أن حد
 غيري يربي أبني أو بنتي
 هزت رأسها موافقة..

-دا كلام جميل بس احنا لينا شروط الأول

رفض أن يستمع لمزيد من الكلام

-قبل الشروط أحب أشوفها وأوديتها للدكتور عشان

أتطمئن

ضربت علي صدرها بحدة..

-تـ إيه أنت بتكذبنا؟

أسرع مدحت ينفي

-لا سمح الله يا طنط بس عشان أتطمئن عليها هي الأول

جاوبت بنفس منطقه ورفعت أصابعها تعد له

-لاء أتطمئن ، الشروط وبعدين الدكتور والمأذون

-خير؟

رفعت أول اصبع

-الشقه تتكتب بإسمها

ذهل مدحت..

-أيه ؟

-وكممان.. حتى لو مش كتبت عليها بعقد جديد علشان

لسه في العدة برضه تدفع مهر جديد وشبكة جديدة.. عشان

تبقى تعرف بعد كده تعد عليها المهر والشقة والحفلة تاني... آه

... إحنا مش هنرمي بنتنا

اعترض مدحت بوهن..

-بس ياطنط..

قامت من مجلسها منهية الحديث

-لا بس ولا حاجة.. فكر مع نفسك وقرر... والوقت

بقي سكتك خضرا

-نعم؟

-نعم الله عليك.. ايه؟ انت عايز الجيران تاكل وشنا؟ انت

الوقت راجل غريب إحنا ستات لوحدنا يالا بالسلامة

قام من مكانه وحاول أن يحثها علي الكلام

-بس ياطنط .. طيب انتم رحتم لأي دكتور؟

تكلمت وكأنها لم تسمعه

-فكر يابني وبعدين الكلام دا

(٢)

فتح مدحت الباب لعزيزة حتى تتقدمه

-نورتي بيتك.. اتفضلي

دخلت بجدوء غير عابئة بالشنط التي يحملها

-طبعاً نورت بيتي

وضع الشنط علي الأرض، ورحب بحماته

-إحم ... اتفضلي يا حماتي

هزت كتفها كما فعلت ابنتها

-متشكرة

تخرج مدحت من الموقف ولم يدرِ ماذا يفعل

-طيب هانزل أنا بقي أجيب باقي الشنط

لم تحب عزيزة أو أمها..

-مش هتأخر

أجابت الأم بضيق

-براحتك

طرق الباب خلفه فالتفتت الأم لابنتها

-خفي شوية

قالت بدلال

-يا ماما بقي

اقتربت الأم من ابنتها مخفضة من صوتها

- يابت خليكى ناصحة.. حبة الراجل عمل كل اللي
طلبناه منه.. خلاص بقي لا يطير منك والمرة دي مش
هيرجع.. افهمي

تمردت عزيزة

- عمل ايه عمله اسود ومنيل ... أنتي ناسيه أنه سابنا
شهر بحاله لحد ما أحنا اللي اتصلنا بيه وبعدين قعد يتشرط
هزت الأم رأسها بلوم

- يتشرط برضه! ماهو كتبلك نص الشقة وجيلك شبكة
تانية وإن كان علي المهر ما احنا برضه نقينا شبكة ثقيلة
تدللت أكثر

- آه كتب نص الشقة بس دا كان حقه يكتبها كلها

- هو في حد في الزمان دا بيعمل كدا.... اسكتي اسكتي
لحسن رجوع

تدمرت عزيزة وضعت يدها علي فمها

- سكت

دفع مدحت الباب بقدمه، ووضع الشنط أرضاً، ثم ألقى
بنفسه علي أول مقعد قابله

-الش.....الشنط

صاحت عزيزة

-إيه دا أنت بترزعهم كدا ليه

تنحني مدحت قبل أن يجيب

-أنا..معلش أصلهم تقال قوي

تكلمت أم عزيزة بفخر

-طبعاً لازم ييقوا تقال.. هو أنا بنتي قليله لازم تدخل

بقيمتها ... يالا استأذن أنا بقي

قام مدحت من مكانه مودعا

-ما بدري يا حماتي

نظرت له حماته نظرة ذات مغزي قبل أن تجيب

-لاء متشكرة.. أحسن أطول عليكم وأبقي فيلم رعب ...

ها

تدخلت عزيزة مانعة أمها من التحرك
-إيه اللي بتقوله دا يا ماما دا بيتك
-إحم إحم
نظرت أم عزيزة بضيق لمدحت
-لا معلى أنا كدا مرتاحة.. بدل ما جوزك يتنحط طول
الليل

همست عزيزة في أذن أمها
-مش قلتيلي اخف أمال مالك؟
ابتسمت الأم بنجث وقالت هامسة
-أنا حماته يا عبيطة يعني أنا كدا خافة أصلا
تكلمت عزيزة بصوت عالي
-سلام يا حبيبي نورتي الحبة الصغيرين دول
ابتسم مدحت مودعا لحماته
- تحبي اوصلك يا حماتي
هكمت خارجة من باب الشقة
-لاء شكرا خيرك سابق
التفت مدحت لعزيزة وأقبل عليها قليلا

-حمد الله علي السلامة نورتي بيتك و نورتي

أجابت بثقل مصتنع

—الله يسلمك

أخذها من يدها وأدخلها غرفة النوم

- شفني أنا جبتيك ايه

سحبت يدها متمنعة عن الدخول

-۷۴

أَمْسِكْ بِيَدِهَا مَرَّةً أُخْرَى

-طيب أدخلني اوضه النوم تلاقىها

طاوعته عزيزة ودخلت الغرفة معه ثم ومع أول نظرة

صرخت

[illegible]

تفاجأ مدحت من رد فعلها

-إيه يا حبیبتي

أشارت إلى جانب السرير

-ایہ دا

اقترب من سرير الأطفال الصغير الموضوع جانب سريرهم
وأمسك حافته

-دا سرير البيبي الجديد ... ها إيه رأيك عجبك

جلست عزيزة علي السرير الكبير باكية

-عجبي! ... هي بقت كدا خلاص؟

تعجب مدحت واقترب منها مواسيا

-إهدي شوية و قوليلي بقت إزاي

من خلال دموعها

-أنت نزلت واشتريت سرير ابني من غيري

مال مدحت عليها قليلا مرتبا علي كتفها في حنان

-أنا قلت مراي حبيبي حامل وتعبانه أريحها.. دا حتى أنا

جبتة من المحل اللي أنت قولتيلي عايزة تشتري منه وحتى كمان

نفس الماركة... بصي

لم تنظر عزيزة بل ولت مدحت ظهرها

-قلت عايزة أجيب مش عايزة يتفرض عليا ... السرير دا

يرجع

خضع مدحت لرغبات عزيزة

-حاضر

أصرت عليه

-الوقت

أعترض مدحت

-نعم؟

صاحبت عزيزة ممسكة بيطنها

-بقول الوق.....آه

تملك مدحت القلق

-مالك يا حبيبي

أجابت بصوت واهن

- مغص مغص جامد أوي
أصل الدكتور قلبي أن الانفعال وحش عليا وخطر علي البيبي

أمسكها مدحت من ذراعها يساعدها علي الوقوف ، رفع
حافة غطاء السرير وأجلسها

- طيب خلاص أرتاحي أنتِ وأنا هتزل أرجع السرير بس
أرتاحي

قامت من مكانها

-لأء رجلى على رجلك

اعترض مدحت وأشار إلي بطنها

-ازاي أنت.....

أمسكت بطنها بشدة متصنعة الألم

- انا متعاندنیش انا مش حمل مناهده

استسلم مدحت مجبرا

-حاضر

(٣)

-أنا عارف فين البواب الزفت دا كل ما احتاجه يكون
مش موجود

تكلم مدحت من خلال أسنانه وهو حامل السرير علي
السلم وعزيزة تسبقه بخطوات قليلة

-أنت عايز إيه منه؟

-يشيل معايا السرير... دا قطعم ضهري

وقفت علي الدرج مانعة إياه من الصعود

-سرير ابني محدش يشيله غيرك

وقف بدوره

-إيه؟

أشارت بإصبعها في وجهه

-أنت عارف البواب دا كان ماسك إيه بإيده ولا كان

بيعمل إيه قبل ما يشيل السرير؟

جلس مدحت علي الدرج متمنعا

-السرير ثقيل جدا وأنا خلاص تعبت

أكملت صعودها الدرج وهي تتكلم آمرة
-وماله.. أنت بتتعب لولد غريب! يالا يالا يلاش دلع
قام مدحت بحيرا يتمم بكلمات استغفار حتى لا يلقي
السريـر من علي الدرج يكسره

- استغفر الله

التفتت إليه

-في حاجة؟

رسم ابتسامة صفراء علي وجهه

-لاء يا حياي ممكن تسبقي وتفتحي الباب

هزت كتفها بدلال ليس بوقته أو محله

-الدكتور قالي اطلع السلم بالراحة مش كفايه أنك

مشرتكتش في الانسانسير ومخليني أطلع السلم وأنا حامل

-إحنا في الثاني يا حبيبتي يعني دا مش سلم

ضربت بقدمها الدرج غاضبة

-مادام مش سلم يبغي شيل السريـر وأنت ساكت

-حاضر

وقفت عزيزة بهدوء تفتح الباب ومدحت خلفها يشعر بكل

عضلات ظهره وساقه تن من الألم ، دخلت الشقة بخطوات

متأنية وهو خلفها يرمقها بنظرات كادت أن تكون نارية
تحرقها، وصلا أخيرا لغرفة النوم ومدحت يجز علي أسنانه ثم
وضع السرير في مكانه السابق وجلس علي الفراش الكبير
- أنت حطيت السرير هنا ليه؟ ... حطه الناحية الثانية

اعترض مدحت بوهن من أثر السلم وحمل السرير

-بس دي ناحيتي

-كانت

قام مدحت محني الظهر لينقل السرير

-حاضر

تأملت السرير في مكانه الجديد وهي في قمة السعادة

-يا سلام أهو دا السرير الصبح ... شكله يجنن مش كدا؟

حاول مدحت منع غيظه من الظهور

-أكيد يجنن.. بس تعرفي.. كان برضه يجنن من الأول

أكدت علي كلامه

-عارفة

جز علي أسنانه وهو يقول:

-طيب كان إيه لزمته بس أشيل السرير وأنزل بيه؟ !

-أنت ما كنتش عايزني انقي سرير ابني؟

-لاء يا ستي.. بس مادام كان أصلا عجبك كنا نزلنا
أتفرجنا ولو لقينا حاجة أحسن كنا غيرناه
رفعت حاجبها وهي تقول مشمئزة :

-وأنا كنت أعرف مين أنك جايب السرير من محل
معفن ودا أحسن حاجة فيه

-صح عندك حق ... أنا رحت محل معفن في مول معفن
عشان أشتري سرير بتمن أوضه كاملة

ألقي مدحت تلك الكلمات في وجهها والتفت خارجا من
الغرفة، فصاحت وراءه:

-أنت رايح فين؟

بدون أن يلتفت لها:

-الحمام

ابتسمت ابتسامة المنتصر وهي تراه خارج من باب الغرفة،
يجر جر في قدميه

-طيب هاتلي معاك وانت جاي إزازه ميه

(٤)

دخل مدحت من باب الشقة، ليجد عزيزة مجهشة بالبكاء.
اختلع قلبه من منظرها

-السلام عليكم

ردت من خلال الدسوع:

-إهيء ... إهيء وعليكم ... إهيء السلام

اقترب منها ممسكا يديها :

-مالك ياعزيزة في حاجة حصلت وحشة لا سمح الله؟

-لاء

يسأل مستغربا:

-أمال مالك بتعطي ليه؟

-ولا حاجة

مسح دموعها بيده ..

-ولا حاجة إزاي.. خير يا حبيبي مالك؟

مسحت أنفها في كم ثوبها..

-مافيش أصلي كنت بقشر بصل وعنيه وجعتني

-أيوه وبعدين؟

-لقتني عايزة أعيط ... عيطت

قام من مكانه، وجلس جانبها علي الكنبه ..

-من منطلق الدموع موجودة أصلا فمافيش حاجة بتنخسر

مش كدا؟

ضحك بشدة، فاتخذت عزيزة وضعية الدفاع ..

-أنت بتتريق؟

ضم فمه حتى يمنع نفسه من الضحك..

- لا أبدا

بكت عزيزة أكثر ..

-أصلك مش حاسس باللي بيا

تكلم بمرح هازا رأسه مؤكدا..

-ما أنتي قلت لي البصل.. و أنا مجربه حقيقي

-بطل هزار

اصطنع الجدية..

-إيه اللي فيك يا ستي؟

وقفت تبحث عن شيء وهي تتكلم ..

-حاسه أني عايزة أعيط ... أصرخ ... أكسر

قام هو الآخر يبعد عنها التحف الموجودة علي الطاولة

-يا ساتر يارب .. ليه بس هو في حد زعلك؟

-لاء.. بس دي طاقة جوايا ... أوديتها فين؟

خبط رأسه بيده مفكرا، ثم ابتسم وهو يقول :

-آه... توديتها فين .. طيب إيه رأيك تتعلمي مصارعه أو

كاراتييه؟ ممكن ملاكمة كمان.

دفعته في صدره..

-برضه بتتريق.

أحاطها بذراعه

-يعني أقولك إيه

-أقولك أنا ... في لعبة اسمها مش فاكهة اسمها

بس دي بتحاكي الواقع يعني بتلبس حاجة في ذراعك وتلعب

تنس مثلا فعضان تضرب الكورة لازم تحرك ذراعك جامد

وفيه ألعاب كتير مصارعة وملاكمة وسباق عربيات.

ارتكن بكتفه إلى الخلف، وقد فهم الحكاية ..

-كويس.. وبكام اللعبة دي؟

كانت مازالت مستندة إلى صدره، فتدللت أكثر..

-مش عارفة.. بس يعني هي تغلا عليا؟

-لاء تغلا عليا أنا

دفعته بعنف غاضبة ..

-آه علي نظام مش خسارة فيك بس خسارة ليا ... ماشي

براحتك

تركته ودخلت غرفة النوم فتبعها محاولا تلطيف الجو، وتغيير الموضوع..

-ها يا جميل عامل أكل إيه النهاردة

جلست أمام المرأة، تضع بعض المرطب علي يدها وتنظر إليه من خلالها وهو يغير ملابسه.

-ولا حاجة

يلتفت إليها وهو يمسك فردة حذائه التي خلعتها في التو..

-أمال البصل كان ليه؟

- أهو بقي فضا .. تقدر تقلي لنفسك بيضتين

أزاحت غطاء السرير، وجلست.

-عزيزة دا مش وقت هزار.. أنا جاي جعان وتعبان
نفسي أكل وأنام.

انزلقت بين الأغطية، ووضعت رأسها علي الوسادة وهي
تتكلم:

-أصل الشغاله اللي جابتها الست الوالدة أخذت أجازة
النهاردة وماجاتش معلش مافيش أكل أتصرف

تساءل مدحت مندهشا، وهو يتمنى لو يستطيع قذفها
بالخذاء في يده:

-أنت بتعملي إيه؟

قالت بصوت ناعس :

-أصل الدكتور قال لي أبعد عن حرق الدم. وكمات
الوحم جايلي بنوم فهنام

(٥)

جلس مدحت أمام التلفاز يشاهد برنامج المفضل، فألقت
عزيزة نفسها بجانبه علي الأريكة.

-مدحت

-نعم

-إحنا عندنا بلكونة ليه؟

نظر إليها في عدم فهم..

-إيه!

-أصل لو علي الغسيل الشباك برضه يسد

عاد لينظر للتلفاز مرة أخرى.

-آه

أمسكت رأسه بيدها تلفته إليها.

-هو إيه اللي آه؟

تنهد ..

-أنا مش عارف أخرة الكلام دا إيه؟

-آخرته أنك عمرك ما قلتلي تعالي وقت المغربية نقعد شوية
في البلكونة ونشرب كوبايتين شاي

عاد ينظر للتلفاز ..

-أنا ما بجيش الشاي وللا نسييتي؟

وكرته بكوعها في ذراعه..

-أنت فاهم قصدي

أطفأ التلفاز من جهاز التحكم وأمسكها من رسخها يوقفها

-فاهم يا ستي.. وعندك حق.. تعالي نقعد شوية في
البلاكونة

تمنعت..

-يا سلام.. كدا؟

-أمال إزاي؟

لم تجب، ونظرت له في عتاب .

-طيب هقولك.. خشي ألبسي الإسدال عليكِ علي ما أنا

أعمل أحلي كوبايتين عصير واسبقك علي البلكونه...

اتكأت عزيزة مستندة إلى سور الشرفة، وتنهدت في
سعادة ..

-شفت القعدة حلو إزاي يا ميدو؟

ابتسم مدحت ..

-ميدو! ... ماشي ياستي ميدو ميدو ... عندك حق
القعدة تجنن والجو حلو قوي
نظرت له ليكمل ..

-بس ؟

-لاء بس الأحلى وجودك يا عزة

صرخت فيه ..

-عزة! ... مين بقي الست عزه دي يا بيه؟

ضحك في سره علي سرعة تقلب حالتها المزاجية

-عزة اختصار عزيزة

أشارت بإصبعها ..

-لاء.. أنت طول عمرك بتقولي زيزة او زيزي.. لكن عزه

دي لاء

-عادي يا عمري.. أنا قلت أغير اسم الدلع بتاعك زي

ما أنتِ غيِرتِ اسمي .. بس

-تقوم تغير اسمي لاسم واحدة ثانية؟

مازال مدحت متحكم في أعصابه بقبضة فولاذية ..

-أبدا يا عمري

وقفت وهي تصيح ..

-عمرك مين ربنا ياخـــــ.....(تداركت الكلمة قبل أن

تكتمل).. أنت خلاص ماعتش عندك إحساس ... راعيني

شوية يا شيخ.. عمال تحب في الست عزة وانا قاعدة

ثم أخذت تتفحص في الشرفات المطلة عليهم ..

- مش بيعيد تكون الست هانم قاعدة في بلكونة قرية

وعماله تسمعك وانت بتتغزل فيها وتضحك علي كيس الجوافة

اللي قاعدة جنبك

قام مدحت ليحتضنها من ظهرها حتى تهدأ، فدفعته بعيدا

عنها..

-حاسب كدا

-انت راحا فين بس؟

-داخله تكونش عايزني اعملكم كوبيتين لمون؟

حايلها مدللا:

-يا حبيبتي هو اللي يحبك ممكن يحب حد معاك وللا بعدك
حق؟

-كل بعقلي حلاوة

أكمل بنفس النغمة:

-لاء هاكل بعقلك عزيزة اللذيذة

ضحكت بدلال:

-بتضحك عليا بكلامك دا قول كمان

أشار حوله..

-هنا؟

انقلبت عزيزة مئة وثمانين درجة..

-شفت ازاي أنت خايف لا الهانم تسمعك؟ طيب خليك

عندك بقي

دخلت عزيزة من الشرفة، وأغلقت خلفها الباب الزجاجي!

-انت بتعملي ايه؟

قالت بتشفي:

-قفلت عليك البلكونه عشان تبقي براحتك وخليك كدا

للصبح

طرق مدحت بقوة علي الزجاج وهو يراها تدخل غرفة
النوم وتغلق خلفها..

-عزيزة دا مش هزار افتحي الجو برد.....

عزيزة ... عزيزة

- كح ... كح ... كح

تأففت عزيزة..

- يا فتاح يا عليم يا رزاق يا كريم

نظر مدحت لها في غيظ..

- في حاجة يا عزيزة؟ .. كح .. كح

- أكيد في .. أنت ناسي أبي حامل وأنت كذا ممكن

تعديني؟

تكلم من بين أسنانه ..

- يعني أعمل إيه؟ ... أقولك أرجع كذا لامبارح وألحقك

قبل ما تقفلي عليا البلكونة .. كح كح .. ولا أقولك كح كح

أقول للسما ماتطرش عليا ... لأ لأ الأحسن أقول للهدوم اللي

فضلت مبدولة عليا للصبح أنشفي فتششف

اعترضت عزيزة :

- للصبح يا مفترى! ... تقصد الفجر

هز رأسه مؤكدا كلامها..

-صح عندك حق.. أنا غلطان.. للفجر

نكرته مبررة تصرفها :

-بتتريق حضرتك؟ .. ماهو كله من عمايلك الفل

-صح

ضحكت ..

-وبعدين أنا كنت بهنر معاك

-كح كح بتهزري! .. عزيزة.. عايز منك حاجة

-خير

رفع سبابته أمام وجهه ليؤكد على كلامه ..

-ماهنر يش تاني معايا.. أقولك.. خاصميني أحسن

صاحت غاضبة :

- أحسن

أمسك رأسه بكلتي يديه..

- ماتنكلميش.. صوتك بيرن في الشقة وأنا عندي صداع

خبطت بيدها علي صدرها مصدومة..

-أنا صوتي عاملك صداع! ... أنا! .. إهيء إهيء

-يجوا يشوفوا البيه اللي بيحسب علي مراته الحامل..
وكل ده ليه عشان سمعت كلامه

لم يصدق مدحت أذنيه.. هل عزيزة تقول أنها تسمع
كلامه؟! هذا حلم بعيد المنال

-أنتِ بتسمعي الكلام أنتِ!

-كمان بتفتري عليا ... المفتري عليه ربنا

-آمين

استشاطت عزيزة غيظا ..

-يعني مش همك؟ .. طيب أقول إيه واللي

متجوزاه.....

حذرها مدحت حسما ..

-عزيزة من غير غلط .. كح... كح.. كح

لانت قليلا، ومدت يدها تساعد علي الوقوف

-خلاص هات إيدك وودي وشك الناحية الثانية مش

طالبة عدوي

تألمت عضلاته كثيرا وهو يحاول الوقوف

-آه... آه كان بدري عليك يا واد يا مدحت

عدلت عزيزة مقولته..

-لاء و أنت صادق كان بدري عليكِ المقلب يا عزيزة
ألقي مدحت نفسه علي الأرض مرة أخرى، وقال متعجبا:
-مقلب !

-أنت قعدت في الأرض تاني ليه؟

-لما أشوف حكاية المقلب دي

حذرتة عزيزة وهي تعني ما تقوله..

-بقولك ايه.. قوم.. أحسن ما أسيبك كدا وأمشي

-~~~~~اه بالراحة ياعزيزة

اتجه لغرفة النوم وهو يقول:

- بقولك هاتيلي الغطا الثقيل

أوقفته..

-أي غطا؟ ... أنت أصلا رايح فين؟

أكمل طريقه وهو ما يزال يتكلم:

-أنام في السرير

كانا قد دخلا غرفة النوم، فأشارت عزيزة إلي السرير

- وأنا أنام فين؟... أنت تروح الأوضة الثانية تنام فيها وأنا

هنا هنا

- إيه ... ليه؟

تعجبت من سؤاله..

- عشان العدوي

- طيب روجي أنتِ الأوضة الثانية

أخذت تمط في الكلام، وهي تمسح علي بطنها

- يعني مراتك حبيبتك الحامل.. وأخذ بالك معايا.. تروح

تنام علي كنبه برضه

- دي بتتفرد سرير

أمسكت في الكلمة، ودفعته في اتجاه باب الغرفة

- أديك قولتها.. يالا روح وأنا هجيلك اللحاف

واحصلك

خرج مدحت من الغرفة مكدرًا..

- حسبي الله ونعم الوكيل

- بتقول حاجة يا مدحت؟

- لاء يا عمري بقول تسلم إيدك

-قوم بقولك الموضوع مهم
أمسك ذراعه يدلّكه وقد آلمته وكزّها..

-خير

أخذت نفس عميق وقالت بصوت حالم
-أنا شامة جمبري

شبك مدحت كفيه في بعضهما واضعا إياهم علي بطنه

-طيب كويس وبعدين؟

زادت عزيزة من نبرة الترغيب في صوتها واستعانت بيديها
لتؤكد ما تقول:

-بقولك شامة ريحة جمبري وجسمي كله بياكلني

نظر لها مدحت في عدم فهم..

-يعني

فتحت عينيها مندهشة من جهله ..

-يعني أنا لو هرشت في أي حثة تتطلع للواد فيها جمبرياية

انزلق مدحت مرة أخرى داخل الأغطية وهو يقول بسخرية

-كويس كذا الناس تقول عليه ابن عز

-ها ها ضحككتني... قوم
نام علي ظهره وضرب كفيه ببعض..
-أقوم أعمل ايه بس
قالت كلماتها ببطء شديد..
-قوم.... هاتلي..... جمبري
-و أنا أجييه منين الوقت؟
أشاحت بيدها في الهواء لا مبالية..
-أنا عارفه بقي أتصرف
ربت علي كتفها في ضيق..
-خلاص يا ستي امسكي انتِ بس نفسك للصبح وأنا
هجييه ... يالا تصبحي علي خير
ووضع الوسادة علي رأسه . رفعت عزيزة الوسادة
وصاحت في أذنه
-مدحت
أمسك أذنه بيده وقال وأسنانه تجز:
-نعم

-امسك ايدي

-ودا وقت رومانسية يا عزيزة

ضحكت بسخرية..

-مين اللي جاب سيرة الرومانسية..

ثم رفعت حاجبها الأيمن ..

- ما هو أنت يا تجيب الجميري يا تمسك ايدي للصبح

عشان مهرش

في عدم تصديق لما يسمعه:

-نعم!

بمتهى الهدوء أجابت مبتسمة:

-نعم الله عليك

-عزيزة اتلمي

أعادت رفع حاجبها مرة أخرى، وقالت بنبرة تهديد

حقيقية:

-ات ... إيه .. اسمع يا مدحت انا صابرة عليك أوي

أفضل اعمل حاجة من الاتنين

-طيب ما نربط ايديك أحسن

-ازاي بس؟

هزت كتيفيها في عدم مبالاة..

-مش مهم .. المهم مهرش

ابتسم ابتسامة صفراء..

-طيب ما تنامي انتِ

-تؤ مش جايلي نوم لسه بدري

صرخ بغیظ:

-حرارارارام

ابتسمت بانتصار وهي تسأله ما تعلم إجابته جيدا

-في حاجة؟

-لاء يا حياقي

الفصل (٣)

الحقووووووووووني

(١)

ألقت عزيزة نفسها علي السرير وهي تبكي أشد بكاء ،
استيقظ مدحت علي صوت بكائها ، رفع رأسه من علي
الوسادة ليري عزيزة قد ربطت رأسها بطرحة سوداء وتبكي ،
هب جالسا:

- مالك يا حبيتي خير؟

ارتمت في حضنه باكيه:

- مات يا مدحت إهيء إهيء مات

أبعدها عنه قليلا متسائلا؟

- إنا لله وإنا إليه راجعون مين يا حبيتي اللي مات؟

من خلال دموعها..

- خليل

ضيق عينيه محاولا تذكر الاسم..

- خليل ... خليل .. آه عم خليل لا حول ولا قوة إلا

بالله..أمي حصل؟

في ضيق ومزید من البكاء أجابت :

- بقولك خليل مش عم خليل ... خليل بس

فرك عينيه محاولا أن يفيق أكثر ليستطيع أن يركز ويتذكر
هذا الخليل الذي أبكى زوجته بهذا الشكل ، احتضن زوجته
ليهدئ من روعها..

- معلش يا عمري إهدي شوية وفهميني مين خليل دا
عشان أقدر أروح أعمل الواجب

- مش ... مش هتقدر تعمل حاجة خلاص إهيء
إهيء

ربت علي كتفيها في حنان:

- ليه بس يا حبيبي أكيد هلحق قوليلي بس مين هو
وهتشوفي

رفعت رأسها من علي كتفه ناهرة إياه..

- تروح ايه بس يا مدحت! ... أنا كل اللي مضايقتي هما
ليه عملوا كدا

مسحت بكم قميصها أنفها وأكملت:

- لو ناوین يموتوه كانوا ليه علقوني بيه ليه عيشوني
الحلم معاه؟!

أعتدل في جلسته وهو يعيد كلامها..

- علقو كي بيه ... عيشو كي الحلم !

أمسكها من ذراعها بقوة:

- مين خليل دا؟ ... أنطقي

حاولت سحب ذراعها وفشلت، فصاحت به:

- خليل ... بتاع مسلسل ميرنا و خليل.. التركي

دفع ذراعها بعيدا في غيظ..

- مسلسل تركي !

- المسلسل اللي بتفرج عليه ... تصدق يا مدحت الكلاب

يموتوا خليل.. بعد مآدو لكل الستات أمل أن في راجل زي دا

في الدنيا يموتوه.. لو كانوا عايزين نهایه ضلمة كانوا موتوا ست

ميرنا في منها كتير ومش مهمه أصلا..

ولاها ظهره وهم أن ينام مجددا وهو يقول:

- صح عندك حق ناس زبالة ... مانجلكيش في حاجة

وحشة

أمسكت ذراعها بنفس الطريقة التي أمسكها بها . فاعتدل في

جلسته مجددا وسحب ذراعها منها..

- أفهم من دا إيه؟ ... إيه المسكة العبيطة دي؟

قفزت جالسة علي ركبته..

- عبيطة أنا عبيطة؟

في ثوان كانت دموع الحزن جفت، وحل محلها شرر الغضب. ضحك مدحت قبل أن يتكلم ..

- أيوه عبيطة لسبين الأول أنك فاكرة أن مسكة النملة دي ممكن توجعني والسبب الثاني أنك بتعطي علي واحد مات في مسلسل دا ركزي معايا.. شوية تمثيل

قال الكلمة الأخيرة ببطء شديد هو يحرك إصبعيه السبابة والوسطي لأعلي ولأسفل ، اتخذت عزيزة وضعية دفاع..

- ولما أنت عارف كل حاجة وفاهم كويس أنه تمثيل

أعادة الحركة التي فعلها بإصبعيه..

- كنت بتلوي دراعي ليه؟

قال بعد أن وضع الوسادة علي رأسه ورقد مجددا:

- عشان راجل أهبل، كنت فاكرك بتعطي علي حد يجد

رفعت الوسادة من علي رأسه باسمه:

- يعني أنت كنت غيران؟

رد بإقتضاب:

- طبعي

- هو إيه اللي طبعي.. اتعدل كدا واحكي

زفر في ضيق:

- أحكي إيه بس.. أنت عارفة الساعة كام؟

- آه

- مادام آه.. يبقى تصبحي علي خير

وضع الوسادة علي رأسه مجددا لترفعها عنه مرة أخرى..

- مافيش نوم إلا لما تحكي الأول

- علي إيه بس؟

رجعت بظهرها مستندة إلى الوسادة، وقالت بصوت حالم:

- عن حبك ليا وموتك عليا وأنتك بتغير عليا موت ومش

بتستحمل النسمة تعدي علي خدي

تنهدت بقوة وأكملت:

- فاكّر لما كنت بتقف قدام البيت بتاع بابا كل يوم

بالساعات بس عشان ممكن تشوفي ولا لما أخويا شافك من

الشباك ونزل اداك علقة سخنه وورملك بيها وشك ولا لما

خرجنا في الشتاء واشترينا أيس كريم والمطر عمال يرخ وأخذت
فيها دور برد معتبر أصلك من ورق الفسفس

ضحكت وانتظرت ييادها الضحك.. ولما لم تسمع صوته
التفتت إليه لتجده غارقا في النوم، فرفعت الوسادة وألقتها علي
رأسه بكل قوتها

- آه إيه في إيه ؟

في تشفي أجابت :

- هي المخدة جت في وشك؟.. سوري يا عمري ما كنش
قصدي ... تصبح علي خير

(٢)

أغلق مدحت باب غرفة النوم وهو يعدل من هندامه ويمسح
بيده علي صدره ، ابتسم عندما رأي عزيزة:

- ها تحي أجييلك إيه وأنا جاي؟

قامت عزيزة من مكانها، ولفت حوله وهي تقول:

- أنت رايح فين إن شاء الله وأنت مظبط نفسك كدا؟

أخذ خطواته في اتجاه باب الشقة..

- مش قلتك يا عمري رايح أقابل عبد الله عشان موضوع

العربية خلينا نخلص بقي ونجيب العربية اللي بتحلمي بيها

استوقفته عزيزة قبل أن يصل للباب:

- رايح تقابل مين؟

- عبد الله

هزت كتفها وهي تقول:

- عبد الله برضه؟

ابتسم مدحت ثم نظر في ساعة يده..

- طبعاً يا عمري بس بقولك إيه أنا أتأخرت على الآخر
هبقى أكلّمك قبل ما أجي عشان لو عايزة حاجة من بره يلا
سلام

ركضت عزيزة لتسبّقه في الوصول للباب وتقف أمامه
ويديها أمامها ممسكة بصدرة

- يعني أنت خارج متأنتك علي الآخر ومضطرب نفسك
عشان تقابل عبد الله؟

في ضيق أجاب:

- آه ... ممكن بقي تحاسبي؟

صاحت:

- دا علي جثتي

اندهش مدحت..

- إيه! ... أنت بتقولي إيه؟

- إوعي تكون فاكر أنك كلتني بحكاية العربية اللي بحلم
بيها والقصص الخاوية بتاعتك دي.. لا دا أنا صحيالك

- صاحية إيه ... أنا مش فاهم حاجة

رفعت عزيزة حاجبها:

- مش دا برضك الطقم اللي المزغودة في قلبها سمر بنت
عمك قالت لك عليه أنه حلو؟

نفخ بشده ثم ولاها ظهره..

- مش كنا خلصنا من موضوع سمر دا؟ دي قد بنتي!

صرخت:

- وأنت كمان عندك بنت؟!!

ضربت علي صدرها بشدة..

- يالهوي يالهوي

أسرع ناحيتها مرة أخرى ل يضع يده علي فمها..

- بس بقي هتفضحينا... كل يوم الجيران تسمع صوتنا

- وأنت عايزني اعمل إيه لما أعرف أن عندك بنت ومخبي

عليا؟

- بنت مين بس... يا عزيزة دا تشبيه افتراضي أنا أكبر من

سمر بـ ١٨ سنة يعني هي تعتبر قد بنتي

نظرت له بشك..

- يعني أنت معندكش بنت؟

- لاء

- جميل.. بيبقي نرجع لمرجعونا ... أنت رايع فين؟

زفر بشدة، وجلس علي الأريكة..

- يا عزيزة مش ممكن اللي انت فيه دا.. هو أنا من يوم ما
عرفتيني كدبت عليكى أبدا ...

ردت بسخرية ماطة الكلام:

- أبدا

- ماشي يا ستي اتريقي ... بس بجد أنا تعبت من عدم
ثقتك فيا

اقتربت منه وهي تضرب كفيها ببعضهما..

- يا حرام.. دا انت غلبان أوي معايا

جلست بجانبه، ووكزته بكوعها..

- أنت!.. دا أنت ماية من تحت تبز

هز رأسه في ضيق..

- أنت إيه اللي يريحك الوقت عشان ألحق معادي؟ تحبي

أتصلك بيه وأفتح الأسبكر عشان تسمعي كلامنا؟ وللا بلاش
منها العربية خالص؟

تجاهلت سؤاله الأخير، وأجابت:

- ما أنت ببساطة ممكن تكون مظبط معاه وعامله حائط
آمان

- حائط إيه! ما علينا.. المهم أنا عايز أنزل.. شوفي أنتِ
عايزة إيه أعمله عشان تسبيني أنزل
ابتسمت وقالت بجدوء:

- غير

- إيه؟

- مالك؟ بقولك غير هدومك

قام من مكانه متجها للباب..

- أنتي بقيتي تعصي.. سلام

صاحت في مكانها:

- خطوة زيادة تحية الباب هصرخ وألم عليك الناس أنت
فاهم

حذرها..

- عزيزة

- لا ... مش المرة دي... المرة دي علي جثتي لو خرجت،
وأنت عارفيني كويس

تنهد في حزن متمالكا أعصابه بصعوبة بالغة..

- طيب يا ستي تحبي ألبس إيه في الليلة الزرقاء دي؟

رفعت حاجبها، وقالت بحدة:

- والله زرقاء... خضراء... حمراء مش مشكلتي

تقدمها إلى غرفة النوم، يريد أن ينتهي الأمر..

- ماشي يا ستي المهم أريحك هتحي ألبس إيه؟

فتحت الدولاب.. أخذت تعبت به قليلا.. ثم أخرجت

بنطلون رياضي مقلّم أزرق مع رمادي. انتقلت إلى الدولاب

الآخر لتخرج منه كترة رمادية

- دول حلوين

استحوذت الصدمة عليه قليلا، قبل أن يسأل:

- إيه دا؟

- هدوم

- تقصدي بيجامة

جلست علي السرير مبتسمة..

- لاء تريننج... في فرق

أمسك الملابس بامتعاض ورفعها أمام عينيها..

- وأنا أروح أتفق علي عربية تمّنها بالشيء الفولاني وأنا
لابس بيجامة؟.. لاء عفوا ترنج.. دا كان الراجل احتقرني

- مش مهم يحتقرك يقدرك.. المهم بيع لك العربية ... يالا
يالا لتأخر

ألقي الملابس من يده أرضا..

- لاء مش هلبسهم.. وهترل كدا واللي عندك أعمله سلام
فاجأته بما لم يتوقعه، فركضت لتخرج من باب الغرفة،
وتغلقها عليه بالمفتاح من الخارج

- اتفضل أخرج من الشباك بقي

خبط مدحت الباب بشدة مطالبا عزيزة بفتح الباب؛ لكنها
أبت وأصرت أن يغير ملابسه بما اختارته له

- يا عزيزة عيب أتأخرت علي الناس.. كمان الجيران
سامعه صوتنا

- لو عايز تخرج غير ومافيش كلام ثاني

- يا عزيزة وبعدين معاكي افتحي

- أبدا

أخيرا.. استسلم مدحت وطرق بضعف علي الباب

- أنا غيرت خلاص
- قامت ببطء من علي الأريكة
- ارجع لورا بعيد عن الباب
- ل؟يه
- عشان أشوفك الأول من خرم الباب
- لما تأكدت عزيزة أنه غير ملابسه فتحت الباب وعلي
- وجهها ابتسامة الانتصار

(٣)

عاد مدحت من العمل فوجد باب شقته مفتوح. اندفع
بشدة إلى الداخل وعقله يموج في العديد من الكوارث التي قد
تكون حلت بزوجه التي - مهما كانت بغیضة - فهي زوجته.
صاح بعلو صوته وقلبه يكاد ينخلع من عنف ضرباته
- عزيزة

فزعت عزيزة من صوته كما تفاجأ من معها. وقف مدحت
مشدوها.. هناك رجل في بيته وعزيزة تجلس معه.. قامت من
علي المقعد واقتربت منه وهي تنظر له لائمة في صوت
خفيض..

- ايه اللي اخرك؟

ثم التفتت إلى الضيف الجالس بابتسامة متكلفة وهي تعرف
زوجها به..

- أحمد ابن جواهرجي ماما

ثم أشارت لزوجها..

- مدحت جوزي

تقدم الشاب بتهذيب من مدحت ماداً يده..

- أهلا وسهلا أخيرا تعرفت بحضرتك.. عزيزة.. أقصد مدام
عزيزة كلمتي كثير عنك

كان توتر الشاب باديا علي ملامحه وطريقة كلامه.. رد
مدحت بتحفظ وهو يمد يده ليصافحه بأصابعه

- أهلا بيبك.. عزيزة بقي ما كلمتنيش عنك.. أحب أتعرف
عليك أكثر

شعر الشاب بالتهديد مخفيا بين الكلمات، فتنحى، ونظر
لعزيرة نظرة استغاثة

تكلمت بطلاقة كأنها لم تستشعر التهديد مثل أحمد:

- إيه اللي أخرك يا عمري؟ دا أحمد كان خلاص هيمشي

- ودي تيجي.. يمشي إزاي بس قبل ما أشوفه

كانت السخرية واضحة جدا في كلماته، فأمسكت عزيزة
يده وجذبه نحو حجرة النوم..

- أفضّل يا أحمد وقفت ليه أقعد ثواني ورجعالك

دخلت معه الغرفة وأغلقت الباب.. مدت يدها وهي تهمس

- هات المرتب

نظر لها في دهشة، فقالت:

- المرتب.. مش أنت قبضت برضك؟

- آه

- هو إيه اللي آه.. هات

أشار مدحت للباب..

- إيه اللي جابه هنا ده؟

- أنا هقولك بعدين ليه.. هات بس الفلوس

أمسكها مدحت من ذراعها وكرر سؤاله، فردت في تعجب
من رد فعله

- مالك يا مدحت؟ أنت كويس؟

- عزيزة ... الراجل دا بيعمل ايه هنا؟

- هيكون ايه؟ جاي ياخذ فلوس

أرخي يده قليلا وهو ينظر لها منتظر أن تكمل ، تنهدت
عزيزة قبل أن تكمل في ضيق..

- أنا رحت أخذت دول من عندهم والفلوس ما كفتش
ولأني عارفه أنك هتقبض النهاردة جبتة معايا عشان أديله
الفلوس بس ... ارتحت؟

لاحظ مدحت لأول مرة الأسورة الذهبية التي تحيط
معصمها، والخاتم الذي يشبهها والذي يتوسط يدها اليمني

- إيه دا؟

- هو دا برضك محتاج شرح؟ خاتم وأسورة

- أنا شايف أنهم خاتم وأسورة.. بس ليه أشتريتهم؟ والأهم
كمان بكام؟

ابتعدت قليلا وهي تمشي بشكل درامي كأنها علي مسرح

- أيوة أيوة.. قول بقي.. الفكرة مش راجل هنا ولا هناك..
الفكرة في الفلوس وأنا اللي قلت مدحت خلاص اتنحرر وبقي
بيغير

- أتنحرر وبقي بغير ... أنت عارفه أني كنت هصور قتيل
بره ياهانم بس ربنا ستر؟

لوت شفتيها يمينة ويسرة بسرعة، قبل أن تقول:

- قتيل مرة واحدة!.. ماشي ياعم السفاح.. المهم أنا عايزة
الوقت ألف وخمست جنيه عشان الراجل اللي قاعد بره
وبعدين نبقى نشوف موضوع القتل دا

- ألف وخمست جنية ليه؟ هما بيساوا كل دا؟

ضحكت عزيزة بسخرية..

- يساؤوا كل دا!.. لاء دا اللي فاضل بعد ما دفعت اللي
كانوا معايا

- كانوا معاك فين؟ كام يعني؟

- ابدا دفعت خمسة آلاف ولسة ألف ونص.. سعرهم لقطه

جلس مدحت علي الفراش مصعوقا يحدث نفسه..

- أسورة وخاتم بستة آلاف جنيه ونص ليه ؟

- عشائهم ماركة يا سيدي ماركة آه مش

أي حاجة يعني

نظر مدحت لعزيزة بتساؤل..

- وأنت جبتي الخمسة آلاف مين؟

أجاب سؤاله مستنكرة تلكؤه..

- اللي أنت ادبتهم لي الشهر اللي فات

قام مدحت من مكانه واقترب منها والغضب يطل من

عينيه..

- فلوس الولادة والعقيقة رحتي جبتي بيهم دهب!

ردت بلا مبالاة وكأنها لم تفعل شيء..

- آه ... ايه المشكلة.. ابقى اسحب غيرهم من البنك.. ثم
دول سعرهم لقطة مش هلاقيه تاني
بدأ صوته يعلو..

- طبعا عندي ميت مشكلة ... الفلوس دي كانت أمانه
معاكي لحد الولادة

تركته وذهبت تنظر لنفسها في المرأة وتحرك ذراعها تتفرج
على الأسورة بإعجاب..

- هو أنت بتكسب قليل ولا حتى أهلك ناس فقيرة؟.. دول
علي قلبهم أد كدا

وقف خلفها ينظر بضيق ليدها

- أنتي عايزاني بعد العمر دا آخذ من أهلي!

- خلاص اسحب من البنك

ضرب كفيه ببعضهما وهو يقول:

- بح خلاص ... البنك بح والفلوس خلاص فنيخوا

التفتت إليه مندهشة..

- هو ما عادتتش عندك فلوس في البنك

- كان زمان.. البركة فـ

- رجعت تنظر لنفسها في المرأة مرة أخرى وهي تهر كنفها
- برضك مش مشكلتي أنا ملزومة منك أتصرف.. لو
راحوا مني مش هعرف اجيبهم تاني بالسعر ده
- أنت ملزومة مني أأكلك وأشربك واعالجك لو تعبانه بس
- ليه يعني؟ هو انا كنت بقرة في الزرية بتاعت أهلك؟
فهرها..
- عزيزة
- بلا عزيزة بلا بتاع بقى.. فلقتني عشان قرشين عمي
قال بإصرار :
- الأسورة والخاتم يرجعوا
- لاء
- عقد مدحت يديه أمام صدره..
- خلاص مافيش فلوس وأخرجني قولي للراجل اللي بره
يروح ياخذهم من أهلك
- مدحت دا مش هزار
- ضحك بسخرية ممزوجة بالمرارة..

- ياريتك بتهزري

تركها وخرج من الغرفة ليجد الصالة فارغة وأحمد لم يعد هناك. لحقت به عزيزة وعندما تبينت أن أحمد غادر صرخت به:

- عاجبك كذا؟ فضحتني ربنا يفضحك يا شيخ دنيا وأخرة وما تشوف يوم حلو أبدا

هم برفع يده، لكنه ثمالك أعصابه، وهو يرى بطنها الذي انتفخ بطفله..

- يا ساتر.. يا ساتر عليك.. دا أنتِ

قاطعته عزيزة:

- مالي ؟

- ولا حاجة.. سكرة.. بس يا سكرة هتدفعي الباقي من معاكي

صاحت عزيزة والشرر يطل من عينيها:

- مدحت

رد مدحت بنفس طريقتها:

- عزيزة

جلست عزيزة مكانها في الأرض وقد استشعرت قوة موقفه
هذه المرة.. غيرت استراتيجيتها، وأخذت تبكي وتتكلم بصوت
خفيض..

- ليه يا مدحت .. ليه عايز تكسر قلبي وتخليني أقل واحدة
في صحباتي

لم يجب، بل تظاهر بعدم سماعها. كررت كلامها بصوت
أعلى، فلم تجد رد

- أنا ببحبك ونفسي أشرفك في أي مكان تكون فيه وكمنا
أتباهى ببيك قدام كل اللي شتموا فيا لما طلقيني وأنا لسه عروسة
في شهر العسل

بدأت تؤثر فيه لكنه حاول ألا يبدي ذلك..

- كل دا عشان كان نفسي في حنة أسورة وخاتم! يعني هو
أنت لو أترنقت فيهم هقولك لاء.... بس أعمل إيه دا بختي

لم يتحرك مدحت، فزادت عزيزة جرعة المسكنة لأقصى
حد، ونهت هامسة:

- أنا كنت عارفة أنك رجعتني بس عشان خاطر الولد وأنا
لو عملتك إيه مش ممكن تحبني

نظر لها مدحت وقد أخذته الشفقة، فأكملت..

- لو اللي يربحك أنك ترجع الحاجة رجعتها.. أنا خلاص
مش عايزاهم ولا عايزة غيرهم.. ماهي الحاجة اللي تستخسرها
فيا مش عايزاها.. أنا عرفت قمتي في البيت دا وبمش هتخطي
حدودي مرة ثانية

ثم أجهشت في بكاء حار كنجمة محترقة للدراما. اقترب
منها واحتضنها بقوة

- أنت ليه بتقولي كذا.. أنت عارفه كويس أني ببحك بس
الحكاية أني مزنوق شوية اليومين دول بعد موضوع العريضة
الجديدة ومافيش فلوس تحت إيدي بس

رفع رأسها بيده، لينظر في عينيها بخنان:

- أنا برضه أطول أنك تكوني مراقي وأم أبني إن شاء الله..
دا أنا أشيلك جوا نن عنيا

أراحت رأسها علي صدره كي لا يرى نظرة الانتصار التي
ارتسمت في عينيها ، أكمل كلامه

- بعدين أنا مش لسه من خمس شهور بس جايلك شبكة
تانية بـ ١٥٠٠٠ يعني لو مستخسر فيكي ما كنتش جيت من
الأول الفكرة بس أني مزنوق

أجهشت عزيزة مرة أخرى في البكاء وهي تخلع من يدها
الأسورة والخاتم، وتمد يدها بهم إليه، فلم يستطع إلا أن يعيدهم
إليها، ويلبسها إياهم بيده

- خلاص خليهم بقى وربنا الرزاق مبروكين عليكِ
احتفت دموعها كأن لم تكن، وابتسمت:
- طيب ماتنساش وانت بتدي أحمد الألف ونص تبقي
تعتذر له علي جليطتك لما كان هنا
ثم تركته ودخلت غرفة النوم وهي تغني..
- بحب الناس الرايقة اللي بتضحك علي طول أما العالم
المضايقة انا لاء ماليش في دول

(٤)

صرخت عزيزة صرخة أيقظت مدحت من نومه ، فتح عينه
ليجد البيت غارق في ظلام دامس ، صرخات عزيزة مازالت
تملأ المكان ، قام من مكانه يتلمس طريقة للصالة وهو ينادي
عليها

- عزيزة انتي فين

قالت عزيزة من خلال صراخها

- أنا اتعميت يا مدحت اتعميت

- طيب بس اهدي أنا جايلك.. متعرفيش الشمع فين

كانت مازالت تبكي وتصيح ، تندب حالها

- يا عيني عليا وعلي بختي أنا ليه بس بيحصلي كذا....

محسودة أنا نجمي خفيف أنا عارفة

حادث مدحت نفسه:

- احنا هنرجع للموال دا تاني هو كل حاجة محسودة

محسودة.. أوف... يا رب صبرني

ثم تكلم بصوت عالي:

- يا حبيبي اهدي كدا وقوليلي مكان الشمع فين
- شمع إيه الوقت بقولك أنا اتعميت تقولي شمع
- لاء سلامتك من العمى ليه بتقولي كدا علي نفسك
وهو يحادثها اصطدم بالمقعد التي تجلس عليه
- مسكتك ههههههههه

اصطنع مدحت الضحك ليهدي روعها، لكنها أبت أن تهدأ
واستمرت في البكاء. أمسكها من كتفيها وربت عليها..

- مالك بس يا حبيبي انت بتخافي من الضلمة ولا إيه؟
- إهيء... إهيء أنا حياتي هتبقي خلاص كلها ضلمة أنا
اتعميت يا مدحت.. إهيء.. انا كنت قعدة بتفرج علي التلفزيون
وفجأة الدنيا ضلمت أدعك في عيني .. إهيء .. مافيش فايدة
برضك الدنيا ضلمة

منع مدحت نفسه من الضحك بصعوبة وهو يفكر هل حقا
يفعل الحمل بعقل المرأة كل ذلك؟!!!...

- طيب أنت سامعة حاجة غير صوتي الوقت؟
سكتت لحظة عن البكاء..

- لاء

- يبقى الكهربا اتقطعت .. ولا ايه؟

عادت للبكاء مرة اخري

- لاء أنا كنت قافلہ الصوت

- نعم! و إزاي بتتفرجي علي الفيلم؟

- لاء أصلك مش فاهم.. الفيلم رعب وأنا بخاف من

الموسيقي التصويرية فبأقفل الصوت وأتفرج بمزاج

صمت مدحت قليلا ليستوعب ما قالته زوجته..

- يعني انتي مش بتخافي من مناظر القتل ولا الدم.. بس

الموسيقي!

- طبعاً الموسيقي دي بتخليني أنط من مكاني.. لكن لو علي

الدم ما أنا بأدبح بإيدي في العيد مع بابا

وقف مدحت مصعوقاً، وممسكاً بـرقبته..

- بتدبحي بإيدك!

أكملت عزيزة وصلت البكاء

- أنت في إيه ولا إيه؟ ايه الأسئلة الماسخة دي... إيه إيه إيه

هاتلي ماما أنا عايزة ماما

- حاضر

ذهب مدحت للمطبخ وأتى بشمعة مضاءة وعندما اقترب
من عزيزة صرخت..

- مدحت أنا بموت.. أنا بموت زي الفيلم بالظبط

- له بتقولي كدا كفى الله الشر

كان ضوؤها يهتز من الرعب..

- أنا شايقة نور من بعيد بيقرّب ماسكه ماردار كبير.. دا
ملك الموت... خبيبي يا مدحت.

ضحك مدحت من قلبه علي طيبة زوجته فهي رغم نكدها
المستمر تحمل عقل طفلة. وضع مدحت الشمعة علي الطاولة،
واقترّب من زوجته

- عزيزة دا أنا مدحت ماتخافيش

عندما أمسكها كانت ترتجف من الخوف فأحاطها بذراعيه
يهدئ من روعها

- يا حبيبي مافيش ماردار ولا حاجة.. دا أنا كنت جايب
الشمعة من المطبخ وبما أنك شفتيني يبقى أنتي ما اتعميتيش ولا
حاجة.. إهدي بقي شوية

دفعته بيدها بعيدا عنها ورفعت حاجبها الذي كاد أن
يلمس طرف شعرها، علي الرغم من الضوء الخافت أستطاع
مدحت أن يري نذير الشر في عينيها

- يعني أنت عارف أني ما اتعمتش من الأول؟

- طبعا يا عمري

- وكنت بتسلي نفسك بيا ؟

- إيه !..

فجأة سطع النور.. لقد عادت الكهرباء مما اضطرهما لغلغ
أعينهما لوهلة. سمعت عزيزة مدحت وهو يهمس بالشهادة،
فقالت:

- كويس أنك عارف أن نهايتك علي إيدي وبتشاهد علي
روحك

قام مدحت من مكانه وهو يضحك..

- مين قال أني بتشاهد علي روحي.. أنا بتشاهد عشان
النور رجع

- يبقى كنت خايف

- لاء يا ذكية أخواتك عشان ربنا لما يقطع النور علي عبد
من ...

قاطعته بجدة ..

- ذكية أخواتي!

لم يدرك مدى ندمه أن تلفظ بتلك الكلمات إلا عندما
أعادها عزيزة علي مسامعه بتلك اللهجة.. ضحك مرتبكا..

- هو أنتي مش ذكية برضه

- آه.. بس الكلمة دي تريقة.. يعني أنت كنت بتسلى بيا
وبعدين بتتريق عليا.. يومك مش فايت

قذفته بالوسائد الصغيرة، فزادت من ضحكه، واستطاع بخفة
تفاديها ثم وقف واضعا يديه علي خصره ويتمايل يمينا ويسارا

- طيب اعرفي تنشني الأول

- اسمها تكوي يا جاهل

ثم أخذت عزيزة تقذفه بكل ما يقع تحت يدها وكلما هرب
من قذائفها استشاطت غضبا.. قذفته بكوب النسكافيه الذي
كانت تحتسيه قبل انقطاع الكهرباء.. وكان هذا الكوب هو
الشيء الوحيد التي استطاعت فعلا أن تصيبه به

- آه آه آه آه آه

سقط مدحت أرضا.. لقد أصابه الكوب في منتصف جبينه.
اقتربت عزيزة بخطوات مرتعبة والذعر يجعل قلبها يكاد يقفز..
وقفت كالمشلولة بجانبه، فمنظر الدماء التي دفقت من رأسه لا
ينبئ بالخير

(٥)

استيقظ مدحت وهو يحس بدوار شديد وثقل برأسه كأن
هناك من يجلس فوقه ، حرك يده بطريقة لا شعورية ليزيح من
يجلس عليها ، اقتربت يد من يده فالتفت بفزع..

- حبيبي أنا ماما

حلت نظرة طمأنينة محل الفزع عندما رأي ابتسامة أمه
الحنونة

- اااااااه

رفع يده ليمسك رأسه متألماً وتساءل..

- هو إيه اللي حصل؟

- أنت مش فاكر؟

- تؤ

تحول نظر الأم للطرف الآخر من السرير.

- طيب قولي لنا أنت إيه اللي حصل

أمسكت عزيزة يد مدحت واقتربت منه..

- حمد لله علي السلامة

بدأت ذاكرته تستعيد ما حدث في الليلة، وعزيرة تجهش في
البكاء .

- أنا كنت هموت من القلق عليك

ثم وكزته

- وأنت عارف أن القلق مش كويس عليا وأنا في
التاسع.... اخص عليك يا وحش

كانت نظرات مدحت النارية تخبر عما يعتلي قلبه وعقله في
تلك اللحظة بعد ان تذكر الموقف بكامله..

- صح.. أنا وحش

اقتربت عزيرة أكثر لتهمس في أذنه..

- نتكلم في بيتنا لوحدنا أحسن ولا إيه

- لاء

ثم صاح..

- فين حماي و حمايا؟

ردت أمه:

- كانوا لسه هنا بس حماتك راحت تقيس الضغط أصلها

كانت قلقانه عليك ويمكن دا رفعها الضغط

- كلميهم يجوا حالا يا ماما عشان أتكلم مرة واحدة
أمسك رأسه من أثر الألم ، أما عزيزة فجلست في ركن
الغرفة تنقر الأرض بقدمها وعلي وجهها إمارات القلق
الشديد.. دقائق وكان الحموان قد قدما، وسأله حماه..

- خير يا أبني؟.. حمد الله على سلامتك الأول
أم عزيزة سارعت إلى جانب ابنتها تهمس في أذنها..
- بص يا عمي أنا خلاص تعبت ، صبرت كثير وتعبت
- طيب مش تقول لي بس في ايه؟
- بتتك أنا مش عارف ليه بتعمل كذا فيا
تدخلت عزيزة..

- يا بابا ماتاخذش علي كلامه دا من أثر الخبطة تخاريف
يعن

نظر إليها أبوها بحدة قطعت كلامها، ثم التفت إلى
مدحت..

- خير يا ابني أنا سامعك
- أنا استحملت كثير.. دي بني آدمة مريضة مش عارف
بالغيرة وللا بالند وللا ايه!!..يعني مرة تيمني في البلكونة في
عز البرد أصل إيه كنت بعاكس الجيران ... ومرة تزلني

بالبيجامة وأنا رايح اشتري عريه وأصلها خايفة لأكون بقابل
واحدة تدبسي في إسورة وخاتم بـ كذا ألف بفلسوس
الولادة وأقول ماشي ... شافني ملك الموت ومارد قلت معلش
كانت خايفة ... النوم اللي مابتهنيش عليه وقلت معلش بتدلع
عليا وهي حامل .. بس توصل انـ..

صرخت عزيزة في تلك اللحظة قاطعة كلام مدحت فلقد
شعرت بنذر الخطر قد أوشكت .. كيف تبرر للجميع قفذا لها
بالكوب وفتح رأسه الذي استلزم عشر غزر

- اااااااااااه ألحقيني يا ماما ... آه

أمسكت بطنها وجلست علي ركبتيها في الأرض تصرخ
متألّمة، وهبت أمها إليها في فزعٍ مرسوم..
- مالك يا قطتي.

نسي أبوها مدحت وإصابته أيضا أمام ألم ابنته..

- مالك يا عزيزة؟

- مش عارفة يا بابا شكلي كذا بولد

هرول الأب ليأتي بالطبيب، واستغلت أم عزيزة تلك اللحظة
لتلقي ببعض قطرات الماء علي الأرض تحت ابنتها

-

إيه دا يا بنتي ... دي ميه العيل ؟

- أAAAAAAAAAAAAه الحقييني يا ماما أAAAAAAAAAAAAه

دخلت الممرضة مسرعة، ومعها كرسي بعجل، وأخذت
عزيزة لغرفة الفحص.. وقد أخذ مدحت القلق، وسكت عن
حكيه، رغم سؤال أمه له. بعد ربع ساعة عادت عزيزة تمشي
علي قدميها وهي تنظر في الأرض. دخلت الغرفة لتجد مدحت
بمفرده مع أمها فغمزت لأمها كي تخرج وتتركهما وحدهما.
اقتربت عزيزة من مدحت وهي تقدم قدم وتأخر الثانية،
فبادرها مدحت بالكلام

- مالك مش عارفة تودي وحشك فين؟.. ايه طلعت مش
ولادة كمان؟

لم تجب عزيزة واستمرت في النظر للأرض..

- مكسوفة مش كدا؟

هزت رأسها بمعني الإيجاب..

- أنا كنت ممكن أموت

رفعت رأسها بسرعة ولهفة..

- بعد الشر عليك

أخفى ابتسامة سعادة بالقلق الحقيقي البادي علي وجهها..

ساعات من القلق، ثم كان مدحت يحمل ابنه، وهو جالس فوق الكرسيّ ذو العجلات في غرفة زوجته. كان طائراً من السعادة وهو حامل لهذا الملاك الصغير بين يديه.. لكن عقله كان يطن ويدور مثل نحلة.. هل أصبح عليه الآن أن يحتمل عزيزة لأنها أتت له بهذا الملاك؟ هل كتب عليه العيش في نكد بقية عمره؟ أليس من الأفضل أن يعيش الطفل دون مشاكل بين أبويه؟.. عند هذا الحد استعاذ من الشيطان، نفذ من رأسه تلك الأفكار ناظراً لطفله بحنان..

- لاء أنا مقدرش أسبيك.. استحمل وأمرني الله

- ثم همس..

- بس اوعي تطلع لأملك يا محمد

- خرج صوتها خفيضاً:

- مير محمد دا! ... أنا هاسميه طلال

- إيه ... لاء محمد علي اسم بابا

رفعت عزيزة حاجبها..

- هتتكد عليا وأنا نفسا؟ طيب أروض ابنك ازاي بالنكد

يعني؟.. أنا قلت طلال يعني طلال

نظر مدحت لابنه محاولاً الابتسام وهو يهمس له في يأس:

- نورت دنييتي يا طلال

CONGRATULATIONS

